

875.6

G89e



THE UNIVERSITY
OF ILLINOIS
LIBRARY

Purchased
from
George W. Robinson
Cambridge, Mass.
November, 1916

875.6

G 89e



Gronovius Johann Friedrich

JOANN. FRID. GRONOVII
EPISTOLAE XXXVII

AD

FILIUM SUUM JACOBUM

NONDUM EDITAE.

COLLEGIT ET NOTAS ADJECIT

AL. M. HARTER,

UNIVERSITATIS MONACENSIS BIBLIOTHECARIUS.

LANDISHUTI MDCCCXXXV.

SUMTIBUS AC TYPIS JOSEPHI THOMANN.
(JOANN. NEP. ATTENKOFER.)

321

Digitized by the Internet Archive
in 2017 with funding from
University of Illinois Urbana-Champaign Alternates

17 NCI A.M.F.

Praefatio.

Anno 1785 Lugduni Batavorum reliquiae bibliothecae Abrahami Gronovii hastae subiectae sunt. Praecellebat haec bibliotheca manuscriptis, inter quae epistolae eminebant, quum Gronoviorum ad se invicem, tum virorum hujus aevi clarorum ad Gronovios datae. Quarum quidem accuratum indicem praebet catalogus, qui Lugduni Bat. 1784 in publicum prodiit, et a pag. 8 — 15 speciatim eas numerat.

G. W. de Zapf Augustanus, a consiliis intimis, hunc epistolarum thesaurum sibi acquirere flagrantissime cupiverat; cujus quidem voti quominus compos fieret, curta impedivit supellex. Attamen quod per se non potuit, id tentavit per alium.

Monachii tunc temporis superbam librorum collectionem habuit Dom. Hepp, civitatis Consul, qui qualibet data occasione eam locupletare studebat. Viro igitur huic litterarum omnis generis fautori eximio, simulque copiis circumfluenti, Zapfius commendavit hasce reliquias, isque amici votis obsequentissimum se praebeuit et pro 500 florenis hollandicis eas redemit.

Ab illo tempore praeclarae istae reliquiae latuere in loco adeo madido, ut dubium non esset, quin brevi putrescerent. At forte fortuna earum fervator exstiti.

Etenim earum pretium quum cognovissem, et facile intellexissem, quae fors hoc squalido in angulo eis immineret, hoc potissimum egi, ut epistolas hasce bibliothecae Universitatis nostrae acquirerem, quod eo facilius contigit, quo magis possessor ipse optabat, ut potior collectionis suae pars in posterum conservaretur. Singulas nunc temporis mei horas tum in investigando, quid quaelibet epistola contineret, tum in secernendis litteris dignis, quae emitterentur, posui.

At quantum deliciarum perlustratio praeclari hujus epistolaris commercii mihi prae

buit, tantum difficultatis erat in eligendis potioribus, cum fere omnes et materiae gravitate et puritate sermonis publica luce adeo dignae visae essent, ut, quid prius seligere-tur, haesitarem. Interim selegi, quas dedit pater ad filium ab anno 1662 — 1671, quas sequuntur illae Joannis Frid. Gronovii ad fratrem Laurentium, apud quem filius Jacobus annis supra nominatis moratus est.

Quae si benevole excipientur, paulatim etiam reliquae subsequuntur. Omnes omnino epistolas hasce ineditas adhuc esse, vix est, quod dubitem; sedulo enim perlustravi, quidquid in hoc litterarum genere nobis subsidii est, et quod bibliotheca Universitatis nostrae, si qua alia, satis superque suppeditat.

Omnes consului epistolarum collectiones, quas Germania et finitimae regiones adhuc dederunt. Biographias omnes, quae huc quidquam facere possent, perspexi et nil intentatum reliqui, quod ad rem pertinere visum esset. Quodsi vero, cum scire nostrum res imperfecta sit, una alterave harum epistola fortasse prelum jam subiit, gratus accipiam, modo honeste corrigar.

In illorum gratiam, quibus historia litteraria non adeo familiaris est, ut, quanta

sint inter doctos Gronoviorum nomina, eos bene scire sumere possimus, brevem Joan. Frid. et Jacobi vitae epitomen dare placuit.

Joannes Fridericus Gronovius 1611 Hamburgi natus, studiorum fundamenta Bremae et Hamburgi posuit. Juris prudentiae operam dedit Altdorfii. Hamburgi amicum habuit Hugonem Grotium, quocum largum postea epistolarum consortium. Profectus per Germaniam, Italiam, Galliam, et Angliam, Daventriae historiarum et eloquentiae Professor constitutus est. In hoc munere excelluit doctrinae copia, ingenii acumine et indagandi felicitate, et id, quod majus est, omnium animos sua sibi humanitate conciliavit. Edidit Livium, utrumque Senecam, Sallustium, Plinium et Plautum cum commentariis, qui propter profunditatem et claritatem hodieque aestimatione digni habentur. Anno 1653 vocatus est Lugdunum Batavorum in locum Boxhornii et Dan. Heinsii, ubi 28. Dec. 1671 sexagenarius obiit. Quamquam bibliothecae nostrae regia et academica in hoc epistolico litterarum genere abundant, desideratur tamen editio epistolarum Jacobi Gronovii, quae prodiit Amstelodami 1678, quam etiam in aliis bibliothe-

cis frustra quaesivi, ut, an revera exstet, dubitarem, nisi catalogus bibliothecae Bunavianae, qui mihi omni exceptione major est, ejus mentionem faceret. Siquis forte hujus libri exemplar pro justo pretio bibliothecae nostrae poterit procurare, ei gratissimum me, paratissimumque praebebo.

Filius ejus Jacobus, vitam ingressus Davētriae 1645, prima rudimenta a patre accepit, postea Lugduni eruditus universitates Oxoniensem et Cantabrigiensem frequentavit, et reversus in patriam nominatus est ad cathedram, quam recusavit; deinde in Galliam, Hispaniam et Italiam profectus est, ubi Florentiae inprimis, Pisis, Venetiis et Paduae moratus et a Cosmo de Medicis, magno Hetruriae duce, plurimi habitus est. Pisis pro largo stipendio 500 aureorum Professor creatus vix ultra annum eo munere fructus est, cum rixosa ejus indoles omnium animos averteret. Reversus in Germaniam Lugdunum revisit et 1679 vocatus ad cathedram litterarum humaniorum 1716 aetatem implevit 71 annis.

Eruditio in eo profundior, quam in patre, praedicatur. De archaeologia et studiis classicis multa praeclareque meritus est.

Teste Cl. Wachlero »war er rüstig im Forschen, Sammeln und Streiten.« Thesaurus antiquitatum graecarum, Macrobius, Polybius, Tacitus, Pomponius Mela, Ammianus Marcellinus, Curtius, Suetonius, Herodotus etc. tantam Jacobo pepererunt famam, ut ejus memoria in orbe litterato nunquam sit interitura.

Hujus Jacobi Gronovii Epistolas LX ad Ant. Magliabechium in clarorum Belgarum ad A. M. nonnullosque alios Epistolis Florentiae 1745, Tomo II. p. 1 — 234 Joannes Targionius dedit, quarum responsa nostra collectio conservat, easque in primis edicurasssem, nisi mala Magliabechii manus me ab opere hoc difficillimo deterruisset.

Jam, benevole lector! primitias hasce benigne excipe, meque, si merear, ad tuum numerum adscribe.

H.

I.

Bonae spei adolescenti Jac. Gronovio

te Deventer ten huysse van de Rentmeester Nylandt in de
Engelstraete.

XVI Cal. Sept. 1662.

Ὁ πατήρ τῷ υἱῷ χαίρειν.

Gaudeo vos incolumes pervenisse et agere. Quae commemoras ὠταλγικά, id utile stomachi tui exercitium puta, qui adsuefaciendus est ad hujusmodi multa concoquenda. Plena est istorum vita. Deo et conscientiae omnibus modis satisfaciendum est*); quod si teneamus, leves sunt ducendae hominum, praesertim imperitorum, iniquitates. Ego ut malim te tui commodi causa mecum esse et studiis incumbere, ita matri repugnare non possum. Nec deerunt libri tibi, si quas horas utiliter occupare velis. Potes a quaestore Nilandio vel a Terboxde petere commodato Excerpta Plautina aut quid simile: potes ab eodem vel ab Hogersio Justinum vel Florum vel Ovidium, in quo lecta vel audita repetas. Miror te verbo non addidisse, ubi vel simul vel seorsum diversifemini. Fratres Jordani cum uxoribus biduum mecum fuerunt, comiter excepti: inde profecti in Brabantiam: unde quotidie reduces exspectamus. Saluta salutandos, imprimis matrem. Hic Dei beneficio omnia salva. Lugduni eodem quo tuas accepi. XVI Cal. Septembr: sive XVII Augusti Gregor. 1662.

*) Solche Lehren wenn unsere Söhne von ihren Vätern öfter erhielten, oder gar den lebendigen Ausdruck davon in ihrer Lebensweise fänden, würde es gewiß bald erfreulicher um unsere Jugend aussehen, und wir könnten weniger bedenklich auf die pädagogischen Experimente hinblicken, die man alljährig auf eine andere Manier mit ihr vornehmen zu müssen glaubt, um ihr ja recht begreiflich zu machen, daß man den Stein der Weisen noch nicht gefunden habe.

II.

Ὁ πατήρ τῷ νιῷ χαίρειν.

Bene habet: grates Deo immortalī, quum salvus ad incolumes pervenisti. Nauseam et vomitus spero pro medicinis tibi fuisse et corpusculum recreasse. Nunc vide omnibus ut agnatis et affinibus indolem et mores tuos approbes, et consuetudinem tuam nemini non jucundam et salubrem praestes. Ante omnia Deum semper praesentem puta, et indulge precibus, non modo statis temporibus, sed et subinde vel solus vel aliud agens, suspiriis aliquot pro te proque nobis ad illum ingenii, salutis et omnium εἰῶν datorem misso(is). *Περὶ τῆς μητρὸς* cave quicquam secus loquare. Omnem juvenilem lasciviam procul habe et in sermonis disputatione noli quemquam convincere, qui id aegre laturus est. Denique quod Terentianus Simo de sui Pamphili facilitate*), tibi dictum putato, et nemini ullo modo molestus esto. D. Lucas Langermannus communicavit mecum excerpta ex Codice Helmstädiensi ad primam decadem Livii. Iis adscripsit nonnunquam lectionem diversam ex alio, quem tantummodo appellat MS. Salutatum meo nomine peramanter atque officiose rogabis, quis sit ille MS. alter, utrum etiam Helmstädiensis, an visus alibi. Nos etiamnum divina clementia valemus: sed publica valetudo nondum

*) Die Stelle, auf welche der Vater hier hinweist, möchte wohl seyn:

Sic vita erat: facile omneis perferre ac pati;
Cum quibus erat cumque una, iis sese dedere;
Eorum obsequi studiis; adversus nemini:
Nunquam praeponens se illis. Ita facillume
Sine invidia laudem invenias, et amicos pares.

saevire definit *). Ante quatuor septimanas 117 urbani in rationes Libitinae venerunt: tertia 113: proxima 130. Extra hunc numerum sunt, qui e nosocomio elati, interdum 20, interdum 30. Dicitum, quod te momordisse scribis, parum intelligo: sed debes pati suum cuique iudicium esse; ob ea, quae tibi bene fiunt, te gratum praestare. Si in Sciaffium et Gudium incidēs, et serio agere videbuntur, non invideo, quo minus te illis des comitem, ita ut sumptum refundam; sin intelliges, humanitatis tantum verba esse, cave cuiquam te obtrudas invito. Vale et recte te gere, et saluta a me omnes diligenter, inprimis venerandos senes, et patruum tuum cum uxore lectissima. Lugduni, nonis Sextilibus Gregor. CIOICLXIV.

III.

Bonarum artium Studiofo Jac. Gronovio,
Hamburgi etc.

Ὁ πατήρ τῷ υἱῷ χαίρειν καὶ εὐπράττειν.

Accepi et posteriores tuas, non tamen tam expectas, quam quas ad primas debes meas. His operiendis crucior, et miror, quid te diligentiam tantam professum, subito reddiderit segniorem. Neque enim, ut cum Gudio et Sciaffio te in viam dares, ita fuit subitum, ut de eo me monere non potueris. Terret etiam, quod illic quoque grassari contagionem comperio: quod quomodo se habeat, fac ex proximis tuis discam. Hic etiamnum gliscit malum. Caeterum nos Deus opt. maximus

*) Die Stadt Seiden hatte erst im Jahre 1635 durch die Pest 20000 Menschen verloren.

adhuc incolumes praestitit. Uxor rediit. Placet autem instituti tui in scribendo ratio: et avide cognosco, quicquid in sermonibus quotidianis non modo penes propinquos (de quibus singulis volo aliquid quantulum etiam cumque nunties) sed etiam apud alios, in quos incidis, audisti: ne, si omnia differas in reditum tuum, magna pars memoria exciderit. Philippus Fontanus M. συμφοιτητής tuus, ut mihi dictum est, illic moratur: si videre vis, apud Pastorem Altenensem gentilem ejus requires. Fac memor sis mandati humani de Lubini Face poëtica. Si offeretur tibi Mûngespiegel, daß ist, ein neuw Bndt wol aufgeführtes bericht von der Mûng ꝛ. ꝛ. durch Tilemannum Griesen, Francfort am Main 1592, in 4°, mihi emes. Vale et saluta salutandos. Lugduni a. d. XIV Cal. Septemb. CIOIOCLXIV.

IV.

Pio et probo adolescenti Jac. Gronovio,
Hamburg ꝛ.

Pater filio S. P. D.

Quid vis auctor sim tibi? quid jubeam? Equidem cupio te reversum videre, et si patiaris elabi Burchardum, haud scio an quemquam tam fidum comitem sis inventurus. Sed, ut adhuc se dant nobis hic tempora, quos alioqui vehementer volo tecum proficere, fratris et sororis filios nondum desidero propter et metum parentum et meam sollicitudinem. Interim feriae abierunt, sed rari etiamnum apparent studiosi, nec credo operas ordinarias indictum iri, antequam praeterierit mer-

catus Falcoburgensis. Tu ipse videas oportet, quid tibi faciundum putes: in qua deliberatione et iste calculus ponendus, ne cognatis sis gravis: quod si animadverteris, equis, velis. Quae praecessit proximam hebdomas, quasi ad ducentos; proxima septem minus Libitina numeravit. Fr. Helmium putabam ante tuum discessum jam domum venisse: ego certe postea illum non vidi, ut non potuerit ille quicquam ferre, quid de te constituerim. Nec quid constituam, ut dixi, certum habeo. Te vellem hic esses, consobrinos tuos nondum. Palpare Burchardo, si potest teneri, donec post paullo una omnes decedatis. Illum Bern. appellatum parum novi. Ingenium videtur fuisse non ἀπύεῖς: an et studiis maturuerit, dubito. Synopses illae quales fuerint, parum reminiscor: cum respondebis, ultimi duntaxat libri, quorum habetis, exemplum appone: et videbo, ut fratri serviam. Francius noster quia Propempticon se tibi scripturum promiserat, quod vides, ad me misit. Audivi postea sororem ejus saeva lue decessisse, ut sit etiam, quod pro tam caro Musis capite timeamus. Ubi rursus scripseris, fac nominatim et cum honore salutes contubernalem nostrum, ut aliquando ostendere ei possim, te ejus meminisse; neque enim quotidie utilitates infinitas mihi praestare desinit. Intellego, Constornejum Helmstadii edidisse scholia Graeca vetera in primum aut aliquot primos Iliados; vide nunc, ubi invenire possis. Saluta omnes inprimis hospites et sanctissimos senes. Lugduni a. d. VII. Cal. Septemb. CXCICLXIV. Vale, vale; nos satis, Deo gratias.

V.

Probo et pio adolescenti Jac. Gronovio,
Hamburg ꝛc.

Pater Filio S. P. D.

Redeunt hodie recitationes jussu R. M. Quin novo more interpositum est decretum Curatorum, quoniam Professores quidam metu contagionis, alii per negotia peregre sint, et absentia sua impediant frequentiam studiosorum fugientium, unde ipsi fugiunt, placere, ut reversi die lunae, qui heri fuit, munia repetant. Videbimus, num haec regia verba sint calefactura auditoria nostra. De collegio nostro ad Atticum quidem percepi etiamnum neminem. Nec praeter peregrinos paucos in viis publicis video. Numerus proximae hebdomadis functorum par fere fuit praecedenti, sed eo gravior, quia inter illos est Cornelius Schrevelius ludi moderator. Die solis subsellio nostro ante me sedentem in templo salvum salutavi: nocte inter diem Martis et Mercurii animam edidit. Quod ubi auditum fuerit in Sicambris et Tubantibus, exspectabunt scilicet amici suffragationes. Frustra: facile enim intelligis, non posse hunc bolum eripi fratris tui magistro. Nos divina indulgentia incolumes. Sed insinuavit tandem malum in angiportum continentem aedibus nostris posticis, in quo ante octo annos saevissime grassatum est. Deus spero nobis aderit. Tibi quid praecipiam, parum exploratum habeo. Desidero quidem, quum eadem illic pro te metuam. Cognatis, dum nondum remittit lues, ut accurrant, auctor esse non ausim. Nec Burchardum comitem dimittere te velim. Nisi fortassis horres mare, et terrestri via, veredariis curribus uti mavis. Sed sic circumspi-

ciendus fidelis comes: atque utinam is Fontanus esset. Quos salutare debeas, quid ego te moneam? Consulem atque etiam ejus fratrem legatum si adire audes, et illi non infra dignitatem putabunt te admittere, facile patior ut salutem a me officiosissimam promptissimamque obsequia utrique deferas, et memoriam mei reficias. Frid. Helmius non te invitavit Tychespolin? Vale, et inprimis ubi es, et vicinae domi, saluta. Lugduni a. d. iv. non. Septemb. CIOIOCLXIV.

Wordenhoffios etiam, puto, salutasti! In bibliotheca publica inter Lindenbrogianos an quid sit collatorum MSS. et inprimis an Ammianus ille, quem paraverat novae editioni, compareat, vide per otium.

VI.

Optimae spei adolescenti Jac. Gronovio
Hamburgi.

Pater Filio S. P. D.

Binas tuas recte accepi, et vos valere gaudeo. Tu autem meis terreri non debuisti. Idem Deus opt. max., qui ad hoc usque nos tutatus est, curae cordique in reliquum habere non desinet. Tu modo non desinas pietatis et precum ex intimo pectore assiduarum. Praeterita hebdomade 205, ex nosocomio 30 elati sunt. Bonum tamen signum ajunt, quod multi in illo publico valetudinario recreantur. Ante octiduum in angiporto nobis vicino puer repente occubuit: neminem tamen postea laborare audiui. Nonis Septembribus (die vene-

ris proximo) repetivi publicas operas: aderant quasi quatuordecim; sed nemo ex nostris, praeter Cru-
cium et Hertogium: nam Junius domo abest, et
negotium quoddam meum in Sicambria procurat.
Heri cum ad Academiam venissem primum, erat
solitudo: guttatim deinde ac vellicatim ad sex ad-
repebant, quia plus dimidium horae transierat,
recitationem in hodiernum distuli. Synopsis en-
vobis, quae si patruo tuo placebunt, non me
operae poenitebit. Literas ad Hojum per viato-
rem nostrum misi, et bis monui satis mature, si
quid vellet, ante hunc diem ad me mitteret. Ho-
spitium Burchardi non abiit intactum: et ipse
Hojus haud scio quo eventu adhibitus est, ut ex
ore illius, apud quem diversatur, mihi narravit
viator. Grallas Capanei illius vel Aloeidae Vien-
nensis, ut praesagiebat animus tuus, risi. In Te-
rentio Lindenbrogiano, quod non ita pridem de-
num notavi, deest mihi litera Z. hoc est a pag.
177 usque ad 184. Vide an impetrare possis ut
hunc defectum mihi suppleant. Similiter cum
ibi essem, emi Müntzbuch, darinnen zu befe-
hen etc. mit einem weitleuftigen register und
prob etlicher Gelder angehenckt, Hamburg in
Verlegung Jungen Wolders 1631. Das weitleuftige
register und die prob exemplari meo absunt, et si
quid aliud sequebatur pag. 240. Hoc quoque vi-
de an possit suppleri. Librum illum Lipsiensem
ignoro: si nihil aliud habet, quam Hamburgensis
iste, eo non indigeo. Octiferia Modius, Lip-
sius, Gruterus e mss. eruerunt: et vox vatis pla-
cet pro illis, quae fucata externa specie oculos
alliciunt: sed sustinui me nec inserui contextui,
quia nec duo illi. Valde me permulsi humani-
tas, qua exceptus in domo antiqua. Recte quo-
que cum senem venerandum Weurdenhofum.

Cur non et filios? et agnatum collegam meum in sacerdotio? Lutkenios quoque praeterire non debes, vel si fastidiose recipiaris. Nam Christiani et Theodorici matres domosque non dubito adisse te, etiamsi nihil de illis scripseris. Vale, vale. Salveant omnes propinqui, inprimis hospites tui et ad miraculum boni, sancti, benigni, generosi, ab laeva vestris aedibus vicini senes. Lugduni in Batavis a. d. v. id. Septemb. 1664. Etiam DD. Huswedelium medicum meo nomine officiose salutare potes.

VII.

Probo et pio adolescenti Jac. Gronovio,
Hamburgum.

Bei Hrn. Lieutenant Gronowen auff dem pferdemark gegen-
über St. Gerdruthen-Kirche abzugeben.

Pater Filio S. P. D.

Ego quoque non minus te desidero, nec minus doleo tam diu interrumpi cursum studiorum tuorum: sed manet idem metus, nisi quod ei paullatim assuescimus, eoque levius eum ferimus. Praeterita hebdomas priori parem numerum Orcino traditorum thesauro retulit minus duodecim. At ab angiporto nostro, unde puerum ante quatuordecim dies elatum scripsi (gurgustium est e regione portae et Jani subter museum tuum, parvo intervallo distans) die sabbati quinque corpora in valetudinarium publicum portata sunt. Heri post mercatum Falcoburgicum primum rursus publice dixi in auditorio frigido et fere inter ignotos. Spero hunc mensem si elapsi fuerimus, vim periculi mul-

tum accisam fore. At tu, si vis ita, et potes a patruale et consobрино divelli, veni cum Deo benevolente. Tychespolin*) naves recta Amstelodamum dimittere puto, aut eo appelli dumtaxat et interficere Hamburgo oram solventes. Deus opt. max., cui gratias debemus infinitas, quod in hanc diem inter tantam stragem nos omnes immunes mali habuit, te saluum salvis nobis reddat. Coccejus rediit haud dubie Curatorum edicto excitus. An brevi sit instauraturus scholas, quibus operam dare soles, ignoro. Nondum enim eum vidi, nisi in templo, et Junius in Sicambris est raudusculi causa, quod mihi in gratiis a quaestore recipiendum est. Nostrorum nemo etiam me interpellavit praeter Crucium et Francium, sed hic speculandi tantum causa venerat e vestigio regressus in patrium oppidum. Quo si veneris, non est necesse, ut eum domi salutes: sororem enim, quemadmodum antea scripsi, contagio amisit. De Quintiliano noli esse sollicitus. pergam strenue. nam filius jam dudum adhibitus a patre ad centones suendos artificium facile sustinebit. Ipse autem Rufus et ego, credo, uterque alterum vitamus. ego illum, ne meae facilitati grave onus imponat, ille me, ne, si ultro adeat, aliquid stipuler. Tu interim etiam etiamque vide, quid — nam frustra fugere, qui ante tempus redeunt. Deus provideat et vos omnes servet. Lugduni ω; τάχος die Martis XVI. Cal. Octobr. CIOICLXIV.

*) Tychespolis = Glückstadt.

VIII.

Optimae spei adolescenti Jac. Gronovio.

Pater filio S. P. D.

Binas tuas recte accepi. Quas incluseras prioribus, ipse porrigere gestiebam, cui destinabantur, eoque ad aedes Carpentarii, cui eum vicinum et familiarem esse sciebam, me contuli. Sed ibi tristissimum accepi nuntium, Hejum ipsum non lue quidem pestifera, sed alio non minus gravi et hic locorum inusitato labore (laborare) morbo, cui et ipse et Silvius mederi se posse desperent. Itaque omnia comparare quasi ad imminentem quot horis decessum, cum maxima omnium, qui noverunt hominem, miseratione. D. D. Vagetius huc si filium mittere volet, atque is meo consilio et opera in studiis indigebit, nihil illi eorum, quae et studiosis et consanguineis adolescentibus praestare possum et soleo, quantum in me est, deerit. Sed nec locum ad habitandum mecum esse, nec si esset, hanc mihi veniam dare uxorem, ut convictores admittam, nosti. Ἡ ἐγγραφὰς, χάψεως ἀμώμῃτα. Dolet quod nondum jubere possum, ut redditum matures. Septendecim supra ducentos praeterita hebdomade numerantur desiderati. Nec tantum passim aliae post alias corripuntur domus, sed etiam in nostra vicinia. Quare, quod volunt, etiam manete, praesertim cum insint octo dierum feriae a V. Non. Octobr. Interim Deum per Christum assidue precare, et bonum habere animum. Sed et ne hospitibus gravis sis, palam dicas licet patruo et ejus laudatissimae uxori, me paratum solvere pro te pensionem victus et mansionis, ex quo tempore cum illis fuisti, quantam in hebdomades pro more loci et honestarum do-

muum justam esse putaverint. Coccejus cum uxore rediit, sed liberos in Selandia apud generum reliquit. Interim nudius tertius sex compellantibus (inter quos Junius) quod neutri exspectabant, privatim se audiendum praebuit. Studiosi adventant paullatim, sed adhuc fere sacrorum. Plura volebam, sed interpellor. Vale τοῦ μὲν μέλημα et salve cum omnibus, quos a me maxime scis salutare debere. Lugd. a. d. VI. Cal. Octobr. 1664.

Weitzii in Terentium et Ovidium Collectanea, sicubi repereris, para. Nihil etiam respondisti mihi de supplementis librorum mutilorum.

IX.

Pio et probo adolescenti Jacobo Gronovio.
Hamburg.

Bei Herrn Leutenant Gronouwen auf dem Pferdemarkt gegenüber St. Gerdruthen-Kirchen.

Pater filio S. P. D.

Hejus jam quintam hebdomada degit in vestimentis (id enim Senecae est lectulo affixum esse ep. 67) magno cum cruciatu, ut nec quomodo commode jaceat, nec quomodo se moveat explicet. Vexatio corpusculi nova et medicis incognita. Ex praecurrente duritie tumor, facile geminatum pugnum excedens, increvit in orbem circa anum, quem vix paxillo immisso apertum tenet. Nec *φυσική* χρῆσθαι potest, nisi stans innixus alicui, et adhibito, qui nec ipse sine gravissimo dolore excipitur clystere. Nec, quibus alioqui desidere aut solvi solent, ullis tuber hoc cedit. Jam et vesicam infestat, sic ut sollicitet perpetuum quoddam excernendi desiderium, ni-

hil tamen, nisi intra XXIV horas semel, eliquetur. Verentur et gangraenam subrepentem. Itaque mirantur, stupent, desperant medici. Talis videtur morbus fuisse, de quo Samuelis V. vers. 6 et 9 et 12 juncto cap. sequenti v. 6. Martialis. 4. 43. Juro per Syrios tibi tumores. de quo Scaliger ad Manil. p. 344. Complorat magna pars oppidi, et jam sepulcrum donaverunt. Burchardi hospita ad nos invisit, ut rescisceret de eo, et num brevi rediturus. Respondi, ita fore cum Deo benevolente, ac fortasse tecum. Interrogata de casibus domesticis, fassa est, filiulam sibi ante sex hebdomades grassanti malo ereptam; neminem tamen exinde decubuisse. Ego indies te magis invitatus careo; sed omnes suadent praecipitem Octob. hunc exspectari. Quae proximam praecessit hebdomas, 170 detulit, ex valetudinario 20: proxima aucto numero inde 195, hinc 40. Sic variant spes et metus vices. Te ubique, etiam apud magnates comiter excipi gaudeo. Cave autem, animos tollant tibi, quae fluxa et vana sunt, praesertim, ubi vanis contingere. Quin ob id ipsum reverentius Deum venerare et tibi magis contendendum cogita, ut semper optimis quibusque probare te possis, quantoque majori te honore dignantur, tanto fac de te ipse humilior sentias, tantoque modestiorem te illis praebeas. De amictu ex necessitate et decoro consulas licet. Tuas uxori statim tradidi et gratas habuit. Cornelio quid velis, ut semel scripsi, non intelligo, dic clarius et vel vulgari lingua. Nec quas ad postremas respondere me velis capio; ante novissimas erant, quas XIII et XV Cal. Octobres dedisti: in quibus quicquid erat, ad quod me reticere nolles, responsum tulit. Bremam si veneris, non est necesse, ut aliunde conquiras, sat

a me tibi mandatorum erit. Est ibi Henrich von Barth coactor commodorum sacerdotioli (Vicariam vocant) quod illic habeo. Is admodum cxx uncias argenti (Imperiales dicunt) debet et jam dudum nec nummos nec epistolas mittit.

Expergefeci nuper hominem, monuique te venturum, ut appelles. Exspecto quid rescripturus sit. Si quoque invisere ibi vis primates, veteres amicos meos, potes alloqui et officiosissime salutare meo nomine duos Consules Dn. a Bentheim et D. Mejerum, Dn. Syndicum Wachtmannum, condiscipulos meos. Dn. Aleus Senatorem, quem olim hic terrarum cognovi, et in peregrinatione Gallica obvium habui. Duos Doctores Formenoir, Protte, Paul. Coccejum: primus huc me jam profecto, duo me rectore honores acceperunt. Sed vix tantum otii ac morae permittent tibi comites. Itaque si non licebit alios, Bertinum dumtaxat et consules duos salutes: si ne utrumque consulum quidem, Benthemium certe, cui gratissimus accessus tuus erit. Quod scripsi de pensione pro victu, ex animo scripsi, nec debet vereri patruus tuus, levio-rem propterea ejus apud me gratiam fore. Dabo libens, et perinde amabo, perinde gratias agam, quod tibi suffugium dederint. Vale et saluta omnes *κηρόθεν*. Non. Octobr. MDCLXIV.

X.

Bonae spei adolescenti Jacobo Gronovio
Hamburg.

bei Herrn Lieutenant Gronouwen auff dem Pferdemarkt gegenüber St. Gerdruthenkirche zu bestellen.

Pater filio, ut sperat, haud degeneri, S. P. D.

Inventus est, qui curva corrigat. Hoc proverbium valet in reprehensores magis molestos, quam justos. Tum in eos, qui mutare et quasi mutando emendare conantur, quae mutari non oportet; sive quod in eis nihil est vitii; sive quod id vitii ita inolevit inveteratumque est, ut nisi magno cum periculo etiam salubrium non possit moveri. Sed hujus modi dictis tam mali utuntur adversus eos, qui bene et in tempore atque ex usu corrigunt, quam boni adversus illos, qui imperite et intempestive. Puta, hoc dixisse adversarios in Schelium nostrum: puta suos Luthe-
ro aut Calvino: puta Romuli faecem de strictis Catonibus. Insonderheit schickt sich auf die Herrn Naseweisen, die alles besser wissen wollen, da sie doch erger machen. De Supero mari frustra dubitas: id enim, ut videtur impetu suo secuisse terras et fecisse sinum Tarentinum, ita et perrupisse Isthmum illum vel angustas fauces, quae Siciliam annectebant Italiae, atque ita illam a corpore suo abscidisse, praesertim si fluctus perpetuo meat a supero ad inferum, ut vult Justinus: et credibile est: alioqui et hic reciprocationem notassent, qualem in Euripo. Scriptionem dare videtur sic posse defendi: abstinere tamen malim: nec memini, quis habeat veterum: nisi forte Symmachus. Speculum illud monetarum cave patiaris elabi tibi: nunquam putavi minus uncia argenti

(1. Imperial.) posse emi. De expenso, si ratio tibi constat, non me acerbum habebis. Quod superest, si vereberis, ut sufficiat ad iter, ubi tempus veniet, a patruo sume. Praeterita hebdomade ducenti sedecim praeter eos, qui e nosocomio, elati sunt. Itaque crescit rursus numerus, et jubeor praecipitem Octobrem exspectare. Elapsis feriis octo dierum, quas dabat memoria liberatae urbis, hodie redeunt publicae scholae. Privatum nullum etiam auditorium habui. Quinque instantes aliquoties, ut Justinum recitem, permoverunt, ut proscripserim, me post horam secundam statuturum de congressibus. Nec majorem admodum numerum exspecto. Typographus de Quintiliano tandem consilium petiit; quod nisi ei dedissem, oleum operamque perdidisset. Percurri per hoc otium et Fabii avi Calpurniique Flacci declamationes: vix est ulla, in qua non aliquid profuturum observarim. haec nunc literis mando, et interim te saepe desidero. Livii duobus prioribus tomis addenda feci, quae vel sola novam editionem merebantur. Suavissimis incomparabilis fratriae literis proxima occasione respondebo. Cum haec scripdissem, reditae mihi, quas Non. Octobr. Julianis, statim ut videras meas, scripseras. Theodorico gratulare reditum meo nomine quam humanissime, et narra, me Philippi a Bertheria *Μεταὰ* et alios libros, quos ille pro me Parisiis emisse se Blaesis scripserat, non accepisse, nec resciscere posse, quo delati sint. De Phoenice placet commentum. Inscriptio sit: SIC RENASCOR vel SIC EXUO SENECTUTEM. Epistolae meae Amstelodamum curandae non mittuntur: sed hic dantur veredario solutis pro vectura obolis quatuor: et per eundem, opinor, recipio tuas numeratis

obolis septem. Interulam unam et alteram cura parari. Item de alia veste, si quid ejus vel honestas vel incipiens frigus novari jusserit, ut poteris, consule. Ubi, quod habes, defecerit, patruus succurret. Puto penes eum esse aliquid mercedis aedium. Si recta per Usipetes via utemini, nemo est, ad quem te allegare possum, ante Suollanos, nisi forte Oldenburgi Berh. Heilersieg et Joach. Hagmeier, ambo Doctores et Consiliarii Comitum, veteres amici et studiorum consortes: vivunt Suolla ad Trajectum; inde huc ibitis praeterito Amstelodamo. Est alia via paullo longior per Frisiam, quam non puto, vos ituros. Si tamen, Groeninga occurrit. Ibi nosti Marefium, Tobiam, Borgefium, Fr. Junium, Deusingium (sed apud hunc cave quenquam de literis aut mea cum illo amicitia) Albingios. Vale, vale, et saluta salutandos. a. d. prid. Id. Octobr. Gregor. MDCLXIV.

XI.

Probo adolescenti Jacobo Gronovio.

Hamburgi.

Ven Herrn L. Gronowen auff dem Pferdemarkt bei St.
Gertruden-Kirchen.

Pater filio S. P. D.

Martialis, opinor est: *Nobis non licet esse tam disertis*. Et multa talia. Quibus evinces facile, id, quod rogas, artis praecepta satis tolerare. Sed consuetudo loquendi intercessit, ne participiis utique sic promiscue uteremur, cum multo brevius et simplicius idem efferre liceat.

Quid enim necesse est, me dicere: *Licet mihi esse hoc agenti*: quum promptum et expositum sit: *Licet mihi hoc agere*. In talibus igitur memor eris illius apud Quintilianum, aliud esse Grammaticae loqui, aliud Latine. Nec vero credes Leopardo *) (quamquam praeclarus est scriptor, neque excutere eum manibus tuis volo, immo ultro hortor, ut diligenter legas) corrigendum esse, quod habetur apud Tacitum: *Haec atque talia plebi volentia fuere*. Sic enim habes et 3 hist. 52. Emblema mercaturae potest esse Mercurius cum petaso et talaribus, sinistra caduceum, dextra sacculum numerorum tenens: qualis pingitur in Nummis Antverpiensibus tab. 45. 10. vel in Inscriptionibus Gruteri p. 51. vel apud M. Vellereum in rebus Augustanis. Carmen, PER ME EST UBICUNQUE QUOD USQUAM EST. De nomine Achillis inter Lycomedis virgines noli mirari. Saepe doctissimos fallunt homines, quae mox omnibus innotescunt. Finge quod de Pyrrha accepisti, tum fuisse τῶν ἀπαξ ἢ δις εἰρημένων: hoc est, non nisi apud unum alterumve (ut nunc etiam nobis) auctorem legi potuisse, qui, ut habent sua fata libelli, infrequentes in manibus essent, ex iis postea eruisse Higinum aetate Tiberii multo inferiorem. Hejus lenta conficitur tabe sine spe salutis; ita attenuato corpore est, ut sceletus videatur, ut ossa et pellis. Goclenius **) postquam e flamma cibum petere

*) Paulus Leopardus, 1510 Isenbergae prope Furnas in Flandria austriaca natus, propterea et Furnius dictus in graecis latinisque literis exactum se ostendit Criticum. Ejus emendationum seu miscellan. crit. libri XX. Antverp. 1568. 4. adhuc sunt in pretio.

**) E flamma cibum petero est des Magens wegen Etwas wagen. Lex 26 D. de operis libertorum haec est: Me-

coepisset et in valetudinario publico praecedente *imperantes* (l. 26 D. de operis libertorum) per bimestre habuisset, numeratus est inter CLXVI proximam praecedente hebdomade humatos. Proxima quatuor capitibus minus habuit. Itaque vel boni ominis causa colligite sarcinulas ad iter. Bremae, si Berthium videbis, nihil exiges: scripsit enim, promisitque circa τὰ Ἐπιφάνια (vulgus Trium Regum vocat) se mihi curaturum, quod liberum est: salutabis tamen, monebisque ut promissa praestet. A Romero, quem dicis, nihil accepi. Iter nostrum fuit Brema Delmenhorst, mill. 1, inde Wilshufen 2, Kloppenborg 3, Leuninggen 2, Haselunen 2, Lingen 2, Nyenhuys 3, Hardenberg 3, Suollam 4. Est aliud paullo longius per Frisiam, Emdam, Groningam, inde Suollam. Utrum libuerit, eligetis. Sed Suolla recta Amerfurtum, Trajectum, et sic domum. Haec scripseram, cum mihi allatae sunt, quas IX. Cal. dedisse ais. Agite, committite vos viae cum Deo benevolente: ad quem tu fac meis precibus tuas conjungas; dein ubique diligens et intentus sis, ut salvi perveniatis. Aderitis expectatissimi. Juventus nobis crescit indies ob summam spem cessantis mali. Confobrinae excessum sane quam lugeo. De Gudio nihil inaudivi post ea, quae tu nuntiaisti. Ἱερεῖον nos quoque ex sententia heri dejecimus: occurrite ut fruamini primitiis. Frater tuus οὐ σμικροῖσιν αὐλίκοις, Ἄλλ' ἀγρι-

dicus libertus, quod putaret, si liberti sui medicinam non facerent, multo plures imperantes sibi habiturum: postulabat, ut sequerentur se, neque opus facerent. Id jus est nec ne? respondit, jus esse: dummodo liberales operas ab eis exigeret, hoc est, ut adquiescere eos meridiano tempore, et valetudinis et honestatis suae rationem habere sineret.

αἰς φύσαισι φορβειᾷς ἄτερ animam inflavit. Ad-
versus frigora te munito. Quod de patruī tui
honoribus exspectatis, ἀγαθῇ τύχῃ. Deus opti-
mus max. nos incolumes et hilares conjungat
per Christum rogatus. Vale. Habes inclusas ad
patruī uxorem. V Cal. Nov. CXCICLXIV.

XII.

Pio et Studioſo Adoleſcenti Jacobo Gro-
novio Hamburgum.

port d'Amſterdam.

Auff dem Pferdemarkt gegen über St. Gerdruthenkirchen
bei Herr Leut. Gronouwen abzugeben.

Pater Filio optimae Spei S. P. D.

Heri tandem tradidit mihi tuas Romerus,
postquam mensem ipsum in mari fluctuatus esset.
Hinc colligas licet, quid vobis exspectandum sit,
si eodem cursu utemini. Verumtamen et terrestres
via anceps, nisi commodos fidosque comites ha-
bueritis. Quid si adsciscatis Johannem, ita ut,
quia fortassis ille sumptum fugiet, immunem
per iter habeatis? Et scis in Westphalia, qui
transitus brevissimus, sic esse institutos currus,
ut commode praeter tres non capiant. Sed hac
de re vos melius formabitis consilium in re
praesenti, quam ego hinc dare possim. Equidem
imaginor vos jam in apparatu esse totos, nec te
alias a me literas, ut nunc est, exspectaturum.
Boineburgii casum sane quam lugeo. Haec fata
regiarum amicitiarum. Vix tamen potest alicui
diu impune esse, qui omnium se potentissimae

domus palam ferat inimicum. Weitzii *) quod occurrit, quamquam non magnae rei est, compares licet, nam patrum tuum fraudare Terentio nolo. Nec in homine bono quidquam est, quod magnopere appetas, praeter diligentiam congerendi undecunque, quae ad quemvis locum ab aliis notata invenire potuit, et quidem fideliter sub nominibus auctorum, ut in quaerendo possis tempus lucrari. Si Bremae vacabit emere Psalms vernaculos Lobwasseri **) ibi editos paullo ante 1630 annum aut circiter (sunt a Matt. Martino, ni fallor, insigniter emendati) tum Aonii Palearii ***) orationes, (nam et hae ibi impressae) emas et mihi portes. Jam animus nihil aliud agitat meus quam iter vestrum, quod Deus optimus maximus fortunet. Vale et saluta plurimum meo nomine omnes, quibus valere dices; sed διαφερόντως illos, quibus plurimum debes. Lugduno Prid. Cal. Novemb. A. C. CIDIICLXIV.

A Jo. Helmio accepi tandem literas et exemplar orationis etiam tibi servandum.

*) Ni fallor, Joh. Weitz putandus est, qui nobis dedit Commentarium in Terentium.

**) Ambr. Lobwasser, Doctor et Prof. juris et Regiomonti in Borussia a consiliis Psalms transtulit in rhythmum germ. qui apud Calvinistas in hymnarios recepti diu in usu fuerunt, donec meliora subsecuta sunt.

***) Aonius Palearius, rectius Antonio de gli Pagliaricci Verulae haud procul a Roma natus inter clariores Saec. XXI. Eruditos numeratur, cujus epistolae orationes et poemata Bremae 165 Amstelodami 1696 et Jenae 1728 praelum subiérunt.

XIII.

Bonae Spei adolescenti Jacobo Gronovio
Hamburg.

Pater filio desiderato S. P. D.

Percusserunt me ictu nec opinato binae tuae, altera supremam valetudinem, altera decessum fortissimi et probissimi senis *) nuntiantes. Nam quod de sperata honoratiore militia patruī antea jecerās, aliorū acceperam. Cui ut ego, si quis alius mortalium, vehementer faveo, atque ut contingat, quemadmodum oportet, Deum veneror, ita doleo profecto optimo illum socero, nos affine carere. Atque in ea re hoc quoque est acerbi, quod itineri vestro mora objicitur. Alioqui quam bene cum Sciasio et Gudio decedere potuissetis! sed videbitis ut absolvamini quam primum. Tempus est enim, et Dei beneficio decrescēte saevitia mali, augetur numerus Studioforum. Praeterita hebdomade quasi centum elati. Burchardi hospita nudius tertius me convenit et de spe reditus vestri interrogavit. Confirmabat autem vehementer, ante undecim hebdomades filiolum sibi exspirasse non contagio, sed alio puerili morbo: neque quemquam alium domesticorum quicquam inde incommodi vel sensitisse vel metuisse: qui aliter ad me detulissent, eos vulgari vitio in pestilentia omnes mortes ei acceptas referendi abductos. Nudius quartus Rampus jamdudum Rectori dicto, allectus est proximus collega Paullus Junius Adriani F. consentientibus suffragiis, absens ipse et comitiorum sui capitis prorsus ignarus. Utrum accepturus

*) Sedulo licet circumspiciens eruere non potui, quisnam fuerit iste senex.

fit conditionem an non, adhuc ignoramus. Jubeo omnes quam officiosissime et amantissime salvere, inprimis hospites. Vale et feliciter ite viam. Lugduno in Batavis a. d. III. Id. Novembr. 1664.

XIV.

Frugi Adolefcenti Jacobo Gronovio
Hamburgi.

Pater filio *τραπεζίτῳ* S. P. D.

Jam medium iter emensos vos putabam, et gaudebam unum alterumve intercedere serenos dies: jam confirmaveram percontantibus brevi repente apparituros: jam animo ruebam in complexus, quum necopinanti redduntur tuae segnes adhuc desidere confessae, teque unas expectare etiamnum meas. Quas profecto an indulgerem tibi, diu deliberavi; adeo aegre est, spem, cujus tantam habebam fiduciam, nullam gravem ob causam, irritam cecidisse. Quid enim moramini? Non vel ipse horror indies saeviora minantis hiberni excitare vos inde debebat? Certe quo tardius decedetis, eo difficiliore reperietis vias. Accingimini ergo: vel si frater patruelis detinetur, accingere tu cum Burchardo. Nummis si eges, a patruo sume: vestibus adversus frigus te muni: rhedam scandite: si in Bremensi principatu milites iter infestum habent, per Lunaeburgensem pergite, ut Bremam veniatis. Ibi quotidie dantur comites reliquae viae. Paullo commodiorem eam, opinor, habebitis, quam nos olim ipso Januario. Nam si omnem illic hiemem trahes, hospitibus gravis tandem et fastidiendus,

quanto id fiet cum tuo meoque pudore? quanta autem jactura studiorum tuorum? Coccejus non desinit pergere. Ego praesentes ultra sustinere non possum. Ad haec quotidie nascuntur causae, in quibus te indigeo. Petunt a me, qui privatim audiunt, ad Justinum dictata: ubi sepelueris, ignoro. Modo quaerebam Solinum abs te collatum; modo item Diatriben, quam, si bene memini, parasti aliquando . . . sittybis, ut conscinderem in usum, coepi enim per otium eam retractare. Quare ades dum et cum Deo benevolente itineri te committe: spero, eum precibus tuis meisque flexum iri, ut salvus pervenias. Hospitibusingere Homericum illud Odyss. O. ver. 74:

Χρὴ ξείνονα παρίοντα φιλεῖν, ἐθέλοντα δὲ πέμπειν.

Et adhuc mandata quaeris? quae si essent, pigrarer dare, ne causam cessandi te invenisse putares. Excerpta Lucani, si quidem descripsisti, bene est: ut nunc demum incipias describere auctor non sum: et illis carere malo, quam novam tibi moram objicere. Unum mando, curam habeas, ut tam probatus desideratusque decedas, quam gratus advenisti. Fratrem nihil aliud dicere volui, quam τοῦ ἱερείου mactati vesicam inflasse. Junius cum applausu et gratulatione et ingenti exspectatione omnium non ordinum, sed hominum spartam suscepit ornandam. Vale et fac in itinere pius sis atque in omnia intentus. Lugd. VII. Cal. Dec. CIOIOCLXIV.

Sc. et Gu. nondum comparent. Francio dedi, quod voluisti.

Haud scio ab ipso, an ab alio acceperim, penes τὸν πάνυ Lucam esse diatriben meam obelis Barthii confixam. Cum ei valere dices, vide an impetrare possis, saltem ut inspicias, et observes, genus notarum quod sit.

XV.

Bonae indolis adolescenti Jacobo Gronovio
Hamburg.

Pater Filio S. P. D.

Utinam cum Gudio decessisses! Apparuit enim, et me sollicitudinis implevit. Infesta dixit latrocinii militum itinera. ipsos per Bremensem principatum iisse: vix duobus millibus passuum a via, quam tenebant, eodem tempore, cum transeunt, nobilem Holsatum e Gallia reducem spoliatum et sauciatum a Sueonum equitibus. In Lunaeburgensi agro non minus insolentium militum esse, certe eum se magis timuisse. Praeterea compulsos in Westphalia mentiri Hamburgo vel Brema (nam qui hoc fateantur, suspectos haberi quasi Hamburgo profectos) se non venire; nam de quibus id constet aut credatur, eos in aedes non recipi, sed sub dio pernoctare in curribus cogi. Quid te fiet? aut quomodo patrios penates recuperabis? Equidem adeo sum incertus, ut, quid jubeam aut velim, omnino nesciam. Profecto, ut ille loquebatur, mitius mare, vel hibernum, praesertim si exoriantur jam dudum desiderati austri. Quod si Amstelædamum usque durare nequis, dumtaxat Amisiam, quam nunc vocant Emdam, pervehi posses, nec prius egredi navibus, quam venisses inter hujus imperii fines; inde brevi freto superato Groningam, Suollam, Trajectum, huc, partim terrestri via, partim commodissimo remulco. Puto autem Hamburgo Emdam ambulare naves. Inquire, et deliberate diligenter, et aucupamini, si quam tutam rationem fortuna dederit; modo ne eis

προὔπτον κίνδυνον te committas; nam meum consilium omne subsistit, nec quidquam expedire possum. Excerptis illis frustra laetaris, *Dardanidam* non est nauci: sed possis inde facere *Dardanidem* a Δαρδανίς. *Hoc Ilium et haec loca Trojam esse jubet* scripsisse Virgilium censeo. Didicisti ad Justinum τὸ *Troja*, ut τὸ *Sparta*, interdum non urbes, sed regionem circa significare. Illa, quae ad *Urbem designat aratro*, ut descripsisti, fere habentur in Servio vulgato ante meliorem illum ex codice Petri Danielis. Versiculi plerique sensu non carent, sed non sunt elaborati, ut decet, nec numerosi. Tu vero parce *) in posterum hanc molestiam mihi imponere, ut Poeta videre. Satis est, quod toties scribi vis, utique si longius propages commeatum. Et hoc vix impetrabis, nec antehac impetrasses, nisi tam paucae essent privatae acroases. Quae te suspensum insomnia terrent, noli timere, sed Deum, ἐν ᾧ ζῶμεν καὶ κινούμεθα καὶ ἐσμέν, qui omnia in bonum nostrum vertet, modo assiduus sis in precibus, et casta frugalique vita ac sanctis propositis eum colere pergas. Bonus Closterus, quum conductum ejus pestis invasisset, migravit ille quidem, sed dum nequit sibi temperare a frequentando veteri hospite, correptus et nudius quartus elatus est. Hic rumor conturbabit omnes Transulanos tardabitque. Proxima hebdomade CVI decessisse dicuntur. Christiano reditum gratulor. Vale et saluta omnes plurimum, inprimis domesticos et vicinam. Lugduni IV Non. Decemb. Greg. CIOICLXIV.

*) Reditu Jacobi longius protracto indignabundum hic patrem habemus, quem hucusque habuimus sollicitum. Sed in postscripto indignationis suae jam eum poenituit.

Jam obsignaveram has, cum mihi sunt red-
ditae, quas III. Cal. Dec. dedisti. Quia tamen
paratos vos video, piget sane suprascriptorum.
Sed non possum volens sciensque in periculum
vos praecipitare. Videbitis et statuetis, qui pro-
piores locis estis. Iterum vale et ἀσπάζου opti-
mam matronam, cujus literas misisti.

XVI.

Aen Jacobus Gronovius

ten huyse van myn Heer Jacob ten Muyl Jaekencooper
woonende op den Poot.
port van Amsterdam. tot Deventer.

Pater filio S. P. D.

Soror sancte adjurat, sibi nunquam ea,*) quae
scribis, in mentem venisse: suspicatur autem
hoc esse commentum alicujus invidi, qui aegris
oculis viderit indulgentiam erga eam avi et ip-
sius obsequium, et hanc frigidam sibi apud eum
suffuderit. Iter Monasteriense non impedio: quin
piget me oblitum tibi esse dare libros quosdam,
quibus diu usus sum, benignissimo domino re-
stituendos. De viatico putabam te prospexisse
tibi, certus me, quicquid impendisses, redditurum.
Nunc consule ac vide, utcunque et undecunque
poteris. Ego duas proximas hebdomades in mo-
lestissimo otio, primo per cruciatum, deinde per
languorem et mensae fastidia, quae ne nunc
quidem vici, traxi. Catechetica Albi per primum

*) Cum epistolae Jacobi ad patrem in collectione nostra
desint, indicare haud valeo, quaenam haec frigida suf-
fusa (Eauge) fuerit.

naviculatorem habebitis: constant obolis triginta seu quinque denariis. Collegas accepimus duos ordinarios, Accipitrarium Theologum Franequera evocandum, et Melderum Dordrechtanum Mathematicum; auctor utriusque creditur Irenarches. Francium convaluisset et in publico jam visum audio; accepit, quod misisti, etsi illic Hermes et ap. . . . et unum praeterea atque alterum, quorum nunc oblitus, fuisse nollem. Heinsius heri hac transiit in legationem suam rediturus, comite Graevio a Vorburganeo Schatfii Amstelaedamum usque. Avunculum tuum per dies pauculos hilare ac laute exceptum Hesychioque *) et Grentemenilio **) donatum dimisimus. Vale et communes affines amicosque saluta, inprimis hospitem venerabilem. a. d. IV. Cal. Junias, quo die Recitationes publicae redibant. A. C. CXCICLXVIII.

XVII.

Optimae Spei adolescenti Jacobo Gronovio
Daventriam.

port van Amsterdam.

op den port ten huysse van myn Heer Jacob ten Mnyl.

Pater filio S. P. D.

Cum salvi pervenistis, et salva omnia reperistis, gaudeo, et Deo opt. max. gratulor. Quae

*) Hoc anno prodiit Lugd. Bat. Hesychii Dictionarium cum variis doctorum virorum notis.

**) Grentemenilius seu quod verius Jac. Palmerius plurimum in rebus criticis versatus edidit observationes in 30 autores graecos et alia opuscula, quibus multum inclaruit.

ad Polybium notas, fero; immo laudo: praeter primum, quod nota figura satis excusatur. De libris, si quando repetetur sermo, obtesteris licet, non irreverentiam, non avaritiam causam fuisse, sed quod putarem non tanti facere, ut accipere aut habere vellet: etsi potest expiari peccatum offerendo quod superest, nihil morae fore. Allocutionis exemplar religatum, quia quod antehac mihi, curatum non est, ornatius et religatum nauta idem, qui libros, qui interulas, qui cultrum, tibi portabit. Interulae, quo die tuas acceperam Trajecto, delatae erant, ut Hardervicanus eas portitor acceptas inde terrestri via mitteret: sed ob ebrietatem aut oblitus est sumere ipse fasciculum, aut credere ei, ut ajunt, noluerunt. *Alacri* opinionem penes juventutem decrescere indies fama est: non penes ipsum de se: neque enim diu est, quum in familiari sermone jactasse fertur, duos esse solos omni ex ordine, quibus cedere velit, Dallaeum et Morum. Quae fila ei Parcae per proceres neant, prorsus incertum: et vilescere enim non ita pridem ibi quoque, neve prorsus abjiciatur tanti habitus, Gallico collegio praefectum iri, nec minus audiui, qualiscunque sit, nobiscum confessorum, si nihil aliud, ne desit turbator. *Πρωταγωνιστῆς* noster cum candidato, quem deducebat, repulsus est et ea acerbitate verborum, ut ejus unquam rationem haberi vetuerint. Octavium nostrum, illum paullo minus quam Pantagathum et antea sciebam et nunc certum habeo frustra sollicitari. Vulcanium utrum dicas, nescio, illum longinquum αἰετὸν ἐν νεφέλῃσι, an vicinum istum, qui in magno emporio nummos cudit plumbeos. Optime consulent haud dubie, si Victorem arcessent. Richardus, ut opinor, jam in Britannia

est, nec vel auri montibus ab instituta peregrinatione avocari se patietur. Qui nos ordinant, solennem diem postridie Nonas Majas non obierunt, quod Irenarches ad legionem isset. is ubi domum fuerit reversus, hoc mense praecipiti demum conventuri putantur. Matri de reditu cave posthac sis molestus: ipsa se admonebit satis, ubi diuturnam sitim patriae et suorum videndi expleverit. Furcillam tibi frater emit et per eundem nautam mittet, cras hinc moturum. Polybii editores hic fuerunt, te quaesiverunt, quod vides specimen dederunt. Vale et communes amicos necessariosque saluta, inprimis venerandum hospitem. Lugduni postridie armorum ostensionis. A. C. CIOIOCLXVIII.

XVIII.

Monfieur Monsieur Jacobus Gronovius

by Master Pieter de Vet in de Gloob, in de Liedenhalsraet, recht over het Ostindische huys

port

tot

London.

Pater filio S. P. D.

Εὐφράνδην visis et magis lectis literis tuis, Deumque precor perinde ut sese habeant caetera. Nos ejusdem beneficio valemus, nisi quod vetus fastidium mihi mensam insuavem, et circa talos tumor gressus pigriores reddit. Avunculus tuus hic fuit et corbitam spoliorum implevit. Aegre ferebat te discessisse insalutato avo: ego te occasionis illecebra necopinantibus et nobis abreptum ajebam. Thevenotus abiit repente non relictis libris Arabicis, sed Amstelædami relictis:

id indicium mihi Steno fecit, cum valere diceret, et num quid in Italiam vellem rogaret, sese autem ante discessum huc eos missurum pollicitus est. Quem iste facundum tibi comitem, si legato affecla haereres, promiserat, Isaacus opinor est, quem spes reliquorum avunculi exigendorum dulcedine ducit et domo expellit. J. Coccius Haga deserta nostro collegio accedet. Reperio in Catalogo Bodleianae Arriani historiam Alexandri Graece; item Indica MSS. Videbis an sit operae pretium conferre. Tum, Halpericum de arte calculatorum MS. cupio scire, sitne aliquid simile Gerberto, quem e legato Scaligeri descripsi, de minutiis Assis. Sed et Exercitationes Rhetoricae ad Theonis Progymn. Gr. MS. et Tiberium de figuris apud Demosthenem. Hi quoque quid tinniant aveo cognoscere. Cll. Hakium et Oldenburgum plurimum salvere jubeo. Eodem officio meo fungere apud magnos viros Casaubonum, Pearsonum, Stanlejum, teque fac illis probabilem praestes. Vale. Leidae. Non. Jun. C1D1DCLXX.

XIX.

For Mr. James Gronovius

behinde St. Marien Church at Mr. Heyde his house
Oxford.

P. filio S. P.

Quas Londinii scripsisti, recte accepi: quas Oxonio primas dedisse ais, vidi nullas. De nummis bene habet: et confido te promissis staturum. Quasi autem non satis damnosus annus hic loco-

rum fuerit nobis, post longam expectationem tandem nuntiat frater, 800 marcas in aedificationem impensas, 340 unciis vel thaleris non solutis inquilinum meum foro cessisse, et rebus amotis fugisse, de biennii redditibus praeter 200 marcas, hoc est 158 flor. 9 stuferos nihil mihi reliquum. Dura haec et vix toleranda; sed ὁ κύριος ἔδωκεν, ὁ κύριος ἀφείλατο· εἴη τὸ ὄνομα τοῦ κυρίου εὐλογημένον. Huic tu quoque pare, hunc precare sine intermissione: tum frugi et bono animo esto: ille nihil, quod salubre sit, deficere nos patietur. Placet, quod in cognatos incidisti: placet, quod bibliothecae custodem habes hospitem. Utere hac commoditate, sic tamen, ut corpusculo etiam parcas, nec nimis assidendo libris aliquid noxae contrahas. Uchtmannus polliciti memor est, et primo quoque die se id repraesentaturum dixit. jam et Mareſchallum Dordrechtanum idem monuisse; sed tum librum sibi in quaestione fuisse. Golius domo aberat: non desinam instare, donec certum ab eo responsum abstulero. De Polybio post discessum tuum οὐδὲ γράω. In Macrobio pergitur: de praefatione, si opus sit, videbo. De Thevenoto cognosci ex superioribus meis: sed abiit et Steno: nec libri ulli sunt remissi. Sorgelius nondum rediit: nondum primum folium Stephani praelo commissum: nondum aes imaginis charta expressum. In prioribus iussi te quosdam Bodleianae libros explorare: in his oblitus sum, si quid erit Noctium Atticarum Gellii. Nos ut antea Dei beneficio: sed fastidium idem stomachi me lente vires recuperare patitur. Vale et salve a nobis omnibus. XVII. Cal. Quinctiles CIOIOCLXX.

Has dabo Neucomio Sartoris F., qui cras mihi se profecturum dixit. Et quia vereor, ut

superiores acceperis meas (ajunt enim Londinii literas non circumferri ad aedes aut hospitia eorum, quibus destinatae sunt, sed oportere quemque, qui aliquas exspectat, ultro a portitore petere) earum exemplum his adjunxi. Hadr. Junius Paulli pater obiit.

XX.

For Mr. James Gronouw

behinde St. Marien Church at Mr. Heide his house
at Oxfurth.

Pater optimae spei filio S. P. D.

Quod disponis diem, ut facere te scribis, haudquaquam improbo: modo des aliquid agitando corpori, nec perpetua sessione valetudinem corrumpas. Cum autem tantum illic invenias salubris negotii, et id tractes sine aemulo, sine obliquo cujusquam oculo, miror tam praepropere te alio cogitare, ubi quo plus humanitatis experieris, eo minus ad persequenda, quae potissimum appetis, otii relinquetur tibi, et, si quid eximium reperiris, verendum est, ne leporem excitaveris aliis. Quamquam autem in morbiferum autumnum incidere te nolim, et olim monuerim, quanto periculo a nostratibus circa id tempus adeantur Galliae ob delicias fructuum, quibus immodice plerumque fruuntur et aut pereunt aut gravibus et longinquis infirmitatibus attentantur: tamen non invitum te ibi tenebo, et liberum tibi relinquo, quandoque transfretare velis. Valckenirius et Berkelius putabant te proximam etiam hiemem in insula ista non male positurum, et primo vere commodius decessurum. Sed hoc sit arbitrii tui, dummodo consilio et

ratione utare. De nummis nihil expeditius videtur, quam ut praebitores tuos, quod supererit, Lutetiam curare jubeas. Postea vias alias circumspiciemus. Ad Macrobiū in tempore advenērunt eoſſe die, quo primum idemque ultimum folium operis tradebam. Latrunculorum ſpecimen, ut a Rypio accepi, adjeci. Calculi ſunt rotundi, orbiculo ſeu περιφερεία non majore, quam pictum vides. In ſuperiori plano nota eſt hieroglyphica: inferior in chartula agglutinata habet Latinam verſionem vel explicationem notae, ut adſcripſit Rypius. Lapis, in quo commemorantur ταυροκαθάψια, notabilis eſt et ſingularis. Videtur certaminis genus fuiſſe dictum ἀπὸ τοῦ καθάπτειν, i. e. καταπραΰνειν, τοὺς ταύρους. Habes horum parabolorum mentionem apud Suetonium Claudio et Claudianum in conſulatu Manlii Theodori. Hodie quoque in Hiſpania celebris la feſte des taureaux. Fragmentum Abſyrti exiſtat in Neandro de menſuris; eſt tamen, quod differat. Verſus de Zonis haud dubie ſunt Varronis Atacini, cujus alias reliquias collegit H. Stephanus. Broumum Ber. nonniſi Anglica lingua legit: in Belgicam tamen ait eſſe tranſtatum. Ex aedibus affinis ejus, qui mederga nos habet, ut cum Plauto loquar, nescio quis propediem illuc navigaturus eſt: per quem ſpondet tibi primum Stephani folium, ego effigiem: ſunt enim exemplaria expreſſa et ſua per librarios venui poſuit, qui in aes incidit. Habui ante annum empta Poëtarum Eccleſiaſticorum opera cum G. Fabricii notis: nuſquam ea reperio; ſi forte abſtulifti et reddere oblitus es, fac ſciam. Vale et Deo te commendare ne ceſſa. Lugduni a. d. III Id. Julias CIOICLXX.

XXI.

For Mr. James Gronouw

behinde St. Marien Church at Mr. Heide his house

Oxford.

Pater filio πρὸς τὸν πόδον κεχαρισμένῳ.

S. P. D.

Testimonium petatum ad Neucomium misi. Περὶ τοῦ Θείου fuge nefanda suspicari. Peccavit ille quidem, sed imprudentia et patientia; nam decoxisse hominem et proripuisse se ab aliis quoque intellexi. Macrobianis si quid addi potest, (nam jampridem, quicquid erat, a nobis abstulerunt) curabo, ut fiat. De ludo Latrunculorum carmen hexametrum scripsit Hieronymus Vida, de quo satis multa aut etiam nimia Jul. Scaliger in Hypercritico. Principium,

Ludimus effigiem belli, simulataque veris
Praelia, buxo acies fictas et ludicra regna,
Ut gemini inter se reges albusque nigerque
Pro laude oppositi certent bicoloribus armis.

Exstat et Gustavi Seleni (i. Augusti Brunsvicensis Principis) Lusus Schaccorum sive Schacht = und Königspiel, Lipsiae 1616 in folio editum. Et est in illo principatu pagus, cujus incolae omnes, agricolae et pastores, quadam lege ac consuetudine loci, sunt horum ludicrorum bellorum callentissimi. Lactis vaccae uberrimas quotidie duodecim cantharos (habet autem cantharus duas pintas vel mengelen) praebere ex ancilla intelligo: alias octo. Apud nos recte est: nisi quod me stomachus et crura laetari non sinunt. Spes secundum Deum est in coeli mutatione, quam cum illo benevolente propediem experiar, et jam expertus essem, nisi me tenuissent invisa de nocturnis

grassatoribus judicia. Neomagi quaestor novus statim ex auctoritate Repraesentantium Ordines (Deputatis vulgo nomen est) mihi conditionem renuntiavit, inventa vidua nobili, quae meum occuparet locum, et mense Decembri recipere me sortem cum debitis usuris jussit: alioquin otiosos ibi nummulos nostros fore. Adeo cito mobiles Quirites poenituit beneficii tanta cum specie dati. Aliquam multus apud Quintilianum satis placuit. Vale et Deo opt. max. te nobiscum commenda. Lugduni a. d. W Cal. Sextiles MDCLXX. Quas ad Meignerum mihi, accepisse te puto.

XXII.

For Mr. James Gronow.

Pater filio S. P.

Simulatque me expediti molestis negotiis, quae ferias mihi inutiles reddebant, tentavi, quod speraveram pridem, si mutato aere stomachum reficere possem. Itaque per Trajectum Grinnes usque cucurri, et ibi nactus, quam quaerebam, solitudinem complures dies egi per rus verum barbarumque et ad Reni ripam satis amoenam quotidie cum fratre tuo mane ac *περὶ δειλὴν* spatatus. Sed cum proficere me nihil viderem, nec pauca experirer incommoda, quae domi vitare poteram, redii Trajectum, postridie ut remulco *οἶκον φίλον, οἶκον ἄριστον*. Intercepit consilium Graevius et secum aliquantisper rusticari compulit: nec minus tamen jejunum et *κακοστόμαχον* dimisit, ut jam non a loco, sed a tempore secundum Deum remedium exspectandum videatur. Excerpta Gelliana satis placuerunt, itaque

velim pergas et submittas reliqua. Simul fac sciam, *όλόκληροι* sint illae Noctes, aut ut pleraque scripta exemplaria, libris quibusdam et capitibus defecta. Tum praefatio, suo loco, an ut vulgo, ad calcem operis rejecta sit. De duris legibus vellem, ut velles. sed *τέτλαδι*: non enim propter nos Pontus *ἄξεινος* fiet *Εὐξεινος*, nec colorem mutabit nigri manus ossea Mauri; praesertim quum, ut festines, nihil urgeat. Tamen omnia tibi libera reliqui, neque te illic ingratis tuis tenere volui. Polybii ¹⁾ tria exemplaria misit ad me Vasbergius; reliqua tibi, ubi es, vel Lutetiae curatum iri pollicetur. Ex iis unum Graevio, alterum Solingio deberi ex sponso monet frater tuus. Macrobianus Berkelius ad te missum se recepit. Salutant te confortes, item Valckenirius, Graevius, avunculus, qui more suo partem feriarum nobiscum hilaris egit. Spanhemius tandem bona fide se nobis addixit. Vale et Deum time. Lugduni a. d. pridie Idus Septem. A. C. CIOOCLXX.

Cum aliquid voles nuntiari iis, qui hic sunt aliqua in dignitate, ad de D. ut tuus Polybius *Κύριοι Καρχηδόνιοι*. D. Golium ter quaesivi, sed non inveni domi: agam tamen cum eo, simulac potuero.

1) Polybium edidit Jacobus noster cum interpretatione H. Casauboni, ac suas et variorum notas adjecit, Amstelodami 1670. 3 voll. in 8. Quae editio tanti apud Eruditos pretii fuit, ut ab Jo. Aug. Ernesti 1763 repeti digna haberetur.

XXIII.

For Mr. James Gronow

recommended at Mr. Gerard Langerman in Burchin lean
at the sign of the weith lion

London this.

Pater filio S. P.

Tuam cum Gelliana collatione epistolam accepisse me scis opinor et pergratam mihi fuisse: dudum enim Amstelodamum responsum Meignero tradendum per Faithium misi. Pupugit autem me non leviter id, quod commemoras ὑποχονδριακὸν πάθος. Cura quales valetudinem, neque ita te studiis dede, ut corpus amittas. Watowitzius ille quis sit, et quando conspectum ejus sperare debeam, verbo addidisses vellem. Nec quid istud sit Lexici, aut quae quorumve legatorum circumductio, divinare possum. Belgam JC. Theophrasti editorem novi neminem. Dan. Heinsius nihil adjecit commentariorum. Stapelius Bodaeus medicus Amstelodamensis fortasse in Botanicis verbosior. Quantum pecuniae a collybistis tuis, quo quamque summulam die, fac proximis perscribas. Ego ex superioribus 27. Maji mihi reditis 100 fl. a Castello, 14. Junii 100 a Corfello, 30. Septemb. 100 iterum a Castello te sumpsisse colligo. Si quid praeterea, cupio cognoscere in antecessum e tuis, ne cum hic repetetur majorem exspectata plagam sentiam. Hactenus tamen nihil de sumptibus queror, et ut sic frugi esse pergas hortor. Virum Cl. Stanlejum ubi videris, cum officiosa salutatione nuntiabis venisse in potestatem meam Aeschylī Προμηθεῖα Δεσμώτην et Ἑπτα ἐπὶ Θήβας MSS. cum scholiis ab ipso primum editis, interdum μειονεκτοῦσιν, interdum πλεονεκτοῦσι. Gustum his subjeci, quo si delectatur et

desiderat reliqua, lubens describam et communicabo. Quanti Londinii sint Biblia Polyglotta et Spelmanni Glossarium et Somneri Lexicon Anglo-saxonicum explora et me doce. Vale ac Deum time. Lugduni a. d. v. Idus Octobr. CIOBCLXX.

XXIV.

For Mr. James Gronow

recommended at Mr. Gerard Langerman in Burchin leon
at the sign of the weith lieon.

London this.

Pater filio εὐδοῦσθαι καὶ ὑγιαίνειν.

Varsevicius (mitte hanc de pectore curam) promissa patravit et fasciculum reddidit sedulo. Pridie dederam, quas ad te postremas una cum injecta scheda ad Stanlejum Marschiolo nostro (quem corpore in exiguo rem numerosam scis) curandas ultro munus id ambienti. Frater tuus ivit confestim illas repetitum, ut ex eisdem disceres, quod valde optabas; sed tabellarius jam *προῦδος*. Pannonio igitur mercedis erit quicquid illi commodare potero et ob officium et ob tuam commendationem. Tua quoque et industria non parum delector et materia, in qua eam exseruisti. Vix aperueram Apulejum, quum adverterunt me in septimo extremo: *Cueterum titione delirantis Althaeae Meleager asinus interisset*. Hoc quidem meliorum temporum: sed, cum scriptus *melegaliter*, haud dubie novator verborum Lucius fecerat, *Meleagriter*, i. instar vel more Meleagri, quasi *Meleagriquement*. Silent hic, qui Florentinos. Utinam tibi eos conferre liceat! neque enim dubito, quin infinita neglexerint. In Taci-

to quoque jam inveni tui memorandi locum. De Augusti vocabulo describi jussi, et his inferui. Pecuniae, quod opus erit, dum manes, quantoque Parisios usque, ibi sumes et de eo me accurate docebis. Lutetiae Valckenirius te promittit inventurum alium symbolum: et minore sumptu hinc permutatum iri ait, quam quod jam permutatum Londinium est, ut . . . summae duplex fiat collybus. Fac modo ubi discessus diem statueris, mature me moneas, et simul, ut dixi, quantum ibi sumptueris. Cupio hoc prius expungere, quam novum debitum subeam, ut ad hoc tanto promptiores in posterum habeam. Polybii (ut antehac significavi) tria exemplaria misit Wasbergius, caetera tibi partim Londinii, partim Lutetiae redditum iri pollicitus: unum abstulit frater; reliquis duobus quid faciam, aut quos invidioso delectu duos praeferam, quibus tuo nomine porrigam, ignoro. Valde placet τὸ ἐξώρκισε et τὸ διαρρέμβομένους. Macrobiani¹⁾ folia postrema misit ad te Berckelius: ego integrum exemplar etiamnum vidi nullum. Dormiunt hi homines, nec nisi acribus tuis literis excitabuntur. Amplius Gollio desiderium hospitis Oxoniensis significavi: id ille videbatur lente ferre, neque omnino negans, neque plane promittens. Catalogum partis Vaticanorum communicarem libenter, si domi haberem: sed commodavi primati viro extra urbem, a quo reposcere importune non ausim. Vale ἐμῶ κεχαρισμένε θυμῶ καὶ ἔπον Θεῶ. Ego in quibusdam cibus incipio gustum habere. Frater et sorores te plurimum salutant. Lugduni a. d. VIII. Cal. Novemb. CIOCLXX.

1) Eodem anno, quo Polybium, edidit quoque Macrobius Lugduni Batavorum.

XXV.

For Mr. James Gronouw

at Mr. Beates house at the peafentmarket hil in

Cambridge.

Pater filio hactenus et ut ominor semper
probato S. P. D.

Non diu, opinor, post scriptas, quas postre-
mum abs te habui, desisti desiderare nuntium
de sarcinula Warleviciana. Et miseram enim jam
pridem et addideram, quod volueras de Augusto
nomine. In Pearsono et Stanlejo vellem, quae
velles; sed qualiacumque de iis, quam nihil. Tibi,
ubi malueris, transfretare liberum est. et promi-
sit Falconerius te Londini inventurum symbolum
ad accipiendos Lutetiae ducentos coronatos. T.
Livii sicubi tomum tertium, de Macedonicis puta
Syriaticoque bellis, mediocriter antiquum repere-
ris, et vacabit, conferre potes. In aliis post asel-
lum diaria non quaero: nisi forte detur Floren-
tiae continuare, quod in optimo Laurentiano ad
librum 22 cap. 5 Gudius inchoavit. De Sorge-
lio jam dudum nihil certi: quae feruntur, Deus
averruncet. Exstiterunt, qui ante tres, opinor, men-
ses Hamburgi se hominem reliquisse ajebant pa-
ratum ad conscendendum. Post hoc nihil de ipso;
sed auditum est triste in eo cursu naufragium
factum. hinc suspicantur ὁ μὴ γένοιτο. Catalogus
Wernerianus est in manu Armenii, qui Latinum
facturum promisit: an praestiturus sit, incertus sum.
G. Hornius dum festinat Heidelbergam, eamque
ob causam et literas Palatini Principis ad Cura-
tores interponit, compendaria via ivit ad plures.
Ego ejus horam XI occupavi, quondam solis Hist.

Prof. reservatam; nunc, ut nulla morum reverentia, et hi et illi et isti in eam irruerunt: neque tamen frequentiam nostram tres aemuli exhauriunt. Pro vetere populo Romano alternis Tacitum enarrare coepimus. Polybiorum et Macrobiorum nihil, quam antehac, locupletiores sumus, nec quantum exemplarium ab iis, quorum tu commoda labore tuo auxisti, petere debeamus scimus. Bonum factum, ut aliquando avum epistola nepote digna salutes. His scriptis alio me verterunt curae. Interim dieculis aliquot elapsis Valckenirius noster, qui ante diem quartum stentorea voce ita, ut in meo auditorio non minus quam ego perciperetur, disputarat, tertio hilare conviva adhibito pransus, neque ipsum biduum tussi et febricula tentatus esset, repente apoplexia ictus animam exhalavit. Collegae casum eum satis fortiter ferunt, neque inutili luctu se macerant, praeter me, quia tua causa velle videbatur. Ubi affines ad funus aderunt, resciscam ex illis, an symbolus, quem tibi Parisios comitem Londinio destinabamus, curatus sit: et si nondum, urgebo, ut primo quoque die fiat. Ab ampliss. Golio impetravi, ut, si non omne, quod per literas ad me datas petit, certe maiorem partem habiturus sit Cl. Heidius tuus. Vehtemannus quoque Abenezram, qui diu in quaestione illi fuerat, reperit, et missurum se pollicetur. Cum has obsequiare vellem, ecce optatas tuas, quas tertio nonas Decembres dedisti. De nummis, prorsus ut rogas, facias licet. neque enim te accuso et si perges tam bene, ut adhuc, rationem subducere, arcae nostrae confidito. Quod si ante discessum in Galliam desideras nos videre, nos vero te multo magis: Deus det, ut feliciter ambules. Et quae ibi collegisti, multo melius hic custodientur, quam

si sarcinas tuas per reliquam peregrinationem au-
geant et onerent. Ad alia proxime, vel coram.
Salve et vale. IV Idus Decemb.

XXVI.

A Monsieur

Monsieur Jacques Gronovius

chez Monf. Frederic Michelsen rue St. Marguerite chez
Monf. Pettevin apothecaire au Faubourg St. Germain

A Paris.

Pater filio S. P.

Primorum votorum damnati sumus, cum sal-
vus pervenisti. De vestibus et annona statues,
ut poteris. neque sordidatum neque elegantem
volo. Et mea quidem necessitatibus tuis non de-
erit benignitas: sed tamen et consortibus tuis il-
lam me probare oportet: et vereor, ne, quo
pluris constet, eo brevior tua fiat peregrinatio.
Sed de his postea cum Deo benevolente videbi-
mus: tu interim tranquillo sis animo, sed ita, ut
et providus cautusque sis et frugi; morum et
studiorum et religionis, quam accepisti, regulam
teneas; profanos nepotes, quos narras, quantum
licet, vites, certe ab iis infici te ne patiare. Cir-
culum cum sigillo et claviculis statim, ut surre-
xeram, in mensa positum reperi et reperisse me
dolui. Si quis hinc ibi notus, ei committam;
nam ut fasci librorum adderem, non venit in
mentem. Uterque autem jam in via est: et Bri-
tannicum Ovius Cimber recta Londinum et Oxo-
nium iturus; Gallicum Oorthius Rothomagum, in-
de ad Coevordium tuum Lutetiam curandum
recepit. Vellem etiam retinuisssem, quos Theo-

philus tibi; haud enim scio, an non sit obnoxium calumniae spargere, ubi longe laxior est istius δικαίου interpretatio. Potes, si hoc melius, in fasciculum bene clausos per aliquem e comitibus illusterrimi Dn. legati, Grotii huc remittere: quem etiam si salutatum ibis, spero fore, ut pro amore, quo et pater ejus et ipse olim me dignati sunt, comiter excipiaris. De tragoediis Senecae inscripta erat epistola a Mons. Soulet advocat en Parlement demeurant a la rue parée vers le Quay des Augustins proche l'hautel de Nemours. Eam periisse ait Plumerus, quod qui ferebat, inciderit in latrones et omnibus rebus sit spoliatus. Commissarium puto rogas Perraultum. Vidi epigramma Fran. Vavassoris S. J. (qui et de ludicra dictione doctissime scripsit, et quem aliquando salutabis opinor) ad Johannem Perrault, in suprema rationum regiarum curia praesidem, olim principi Loudaeo a consiliis et secretis; sitne hic ille noster, an quo gradu eum attingat, ex te cognoscam. Alter, ni fallor, quem nominavi, vir est Mons. le Menestrel, Con. du roi, tresorier grand de batiments arts et manufactures de France. Daventria nuntios a discessu tuo nullos habui. De Cramoyfio videbimus: sed prius tu res tuas compone. Centunculum (sic enim voluisti scribere) ne fastidi, sed adi crebro et audi vocem quantumvis languidam. Vale. Lugduni nostrae a. d. pridie. Non. Mai. postridie quam nactus tuas 1671.

Περὶ τοῦ Θείου pauca, nec nimis aperta. Scis enim apud rimarum plenos.

XXVII.

A Monsieur

Monsieur Jacques Gronovius

chez Mr. Frederic Michelsen rue St. Marguerite chez
Mr. Pettevin Apothecaire au Faubourg St. Germain

A Paris.

*Πατήρ καὶ Σύγκληροι Τιῷ καὶ συγκλήρῳ
τριποδῆτῳ χαίρειν καὶ εὐπράττειν.*

Superioribus tuis statim respondi lectis et eas se curaturum ὁ Πέλας recepit. Περὶ τῶν ἀναλωμάτων nec displicet sollicitudo tua, nec tamen nimis sollicitum volo. ὁ Θεὸς ὅψεται tu modo tene institutum, et supervacanea vita. Scis me rei studuisse, et multa desideriiis meis negasse, non ut haberem, quod homines loquerentur, uteretur nemo; sed ut esset, unde vos uteremini, non modo ἐμοῦ φρούδου, ἀλλὰ καὶ περιλοίπου. Sed non est opus, ut repetam, quae scripsi, cum aut jam acceperis istas, aut Covordio flagitato accepturus sis. Quod refers de summis viris, comiter excepisse te et honestam nostri mentionem habere, etsi non novum neque inexpectatum, tamen melli fuit mihi. Tu fac vicissim, quavis illi occasione cognoscant, in rebus humanis eorum mihi memoria et veneratione nihil esse sanctius. Ipse, quod potes, praesentes cole, prende, deliba et hauri, oculis et animo fige tam pulchras imagines, et cogita nusquam terrarum tantas aurei seculi reliquias tibi repertum iri. Cl. Syenio ab ampliss. Moneaucio fuit gratissimus nuntius. nec displicet ei, si fieri aliter nequit, per legatum. sed sperat, se compendiosiore inventurum viam. de quo simulatque ab ipso accepero, cognosces. interim cura-

bit depingi formam Hippopotami nostri Moneaucio promissam. Theatrum biblicum omnia hic bibliopolia perreptantibus nusquam comparuit: incidi tamen in hominem, qui se nosse diceret et variis formis editum, eoque varium pretium, potissimam τετράπτυχον oblongam: seque daturum operam, ut sciam propediem, quanti sit. Ad Cl. Carcavium, quia id ei non ingratum fore significas, scribam, ut primum vacabit. Tres habeo collationes Gellii¹⁾ regii doctorum hominum manibus factas. hi omnes satis me docent praefationem in eo exemplari esse, quod olim postremi libri ultimum caput ponebatur. et huic praefationi subjici lemmata capitum per omnes XX libros. Sed quid sequatur ea lemmata, et unde incipiat contextus auctoris, quasi de compacto silent. Suspicio autem prima duo capita libri primi eo in volumine deesse; quando nihil a quoquam ibi varietatis notatum video, quum tamen habeant dignos vindice nodos. Codex est, ut antehac ordo fuit, numero circiter 457 et a lib. I. ad. VI. usque pertinet: sed tam, ut dixi, a principio, quam in fine aliquid desiderari censeo. quod accurate cognoscas, velim, et a quo capite, quibus capitis ejus verbis et literis incipiat, quove capite libri VI^{ti} quibusve verbis et literis ejus capitis finiatur, mihi perscribas. Quae in Polybio et Macrobio notas, videntur, ut in hoc transcurso, satis placere. *Puras tabulas* puto, in quibus nihil scriptum esset. Τὴν ἐπιχώριον γλ. cave fastidias. hoc in tuis unum non probavi. Quin tu omnibus modis cura, ut promptam eam habeas utpote magnum et insigne vitae instrumentum.

1) J. Frid. Gronovius Auli Gellii noctes 'atticas cum notis et emendationibus Lugd. Bat. 1687. in 8. prelo submitit.

De cibo et potu nihil addam. spero te provisorum,
ut iis toleres corpus, non obruas. Vale καὶ εὐή-
μερῶν διατέλει. a. d. XIV Cal. Jun. CIOICLXXI.

XXVIII.

A Monsieur

Monsieur Gronovius

chez Monf. Frederic Michelsen rue St. Margarite chez
Monf. Pettevin apothecaire au faubourg St. Germain.
port.

A Paris.

Pater filio S. P.

Quas viri amplissimi Capelanus et Thevenotus commiserunt tibi, statim curavi, alteras ad Strykerum Amstelaedamum, alteras ad collegam. Places mihi, cum magnitudinem illius viri, quem scis, quanti semper fecerim, capis, et totum ei te in disciplinam das. De Ammiano¹⁾ cum Calcanéo locutus sum; et putabat ille quidem rem se factam habere; pactum conventumque esse: nihilo minus cum Caesio acturum: formam non promittebat nisi ὀκτάπτυχον duorum tomorum: δίπτυχον forte maximam facilius alter pollicebitur. sed cunctator est: et videndum, ne multos annos penes se, ut solet, ineditum ἀρχέτυπον detineat, nisi dura quadam lege ad rem properandam stimuletur. Orthius ipse vetus noster est, qui fasciculum curandum ultro suscepit, nec dubito, quin jam aut naviget aut Rothomagum pervenerit. Idem ad Gombervillum literas meas misit. Ὁμοίεστιον, qualem desideras, commodum, immo qualemcun-

1) Ammianus Marcellinus ex emendatione et cum notis Fr. Lindenbrogii et Valesiorum. Recognitus et notis illustratus a Jac. Gronovio prodiit Lugd. Bat. 1695. 4.

que, unde tibi? Scis, quam rara sit avis! Non invidebo tamen, ut Claudius Palumbum, si captus fuerit. Tu interim modicis esto laetus, ut poteris, et confide τῷ κρείττονι, quo dante, me salvo, utilia tibi non deerunt. In Annaeo isto, si tempus melius collocare potes, nolo te fatiges. Omnia sunt post asellum diaria post Florentinum. Clarissimos Viros, veteres amicos meos, et quos recens adjunxisti, Seguinum, Corfartium, Justellum, Coutillerium, officiosissime meo nomine saluta. Seguino etiam τῷ σεβασμιωτάτῳ dices me accepisse quidem donum ejus et longe gratissimum habuisse: sed ejus liberalitatem profuisse tibi, an fratri: cum mihi sic placuisset id exasciatissimum opus, ut jam antea statim, ut vidi apud bibliopolam, aere meo paratum possiderem. Carcavii et Thevenoti praenomina fac ut sciam. Et si quid habetis de Fabro. migravitne vel migraturus εὐδαίμονα Κόρινθον, an manebit Teneates? Vale et Deum time καὶ ἀδιαλείπτως προσεύχου. Lugduni a. d. III. Id Jun. CIDIICLXXI. Gallicae linguae magistro nunquam usus sum. nec te ut adsciscas volo. sufficit legere quotidie quantillum, nec quibuscum potes, aliter quam Gallice loqui. Hadriani historia Francorum in auctione Carpentarii empti hoc ipso die bibliothecam ornavi. Iterum vale.

XXIX.

A Monsieur
Monsieur Gronovius

chez Monf. Frederic Michelfen rue St. Margarite chez
Monf. Pettevin apothecaire au Faubourg St. Germain
port.

A Paris.

Pater filio, quem frugi esse optat et confidit,
S. P. D.

Quam multa praeter opinionem homini accidunt! Quoties quae specie atque incepto pulchra et laeta apparuerant, usu atque experiundo aspera eveniunt et contraria! At tu τέτλαδι et στέργε, quorum copia est, nam ut majore imperio doceatur officium, haudquaquam tentandum arbitror. Vides, quanto possit gravius nocere, si quantilla in re (licet jure) offendatur. Quare sic irascere imperitiae hominis, ut potentiam revereare. Forte ipsa dies longa et quas per proximum cursorem misi, eum tibi mollient. Quis autem permissum Bataviae inquilino totos describere Jamblichos? totas Λογαρικάς; Sed mutantur tempora, nec omnibus similiter arridet Diva, gratum quae colit Antium. Te si haec gratia deficit, habes alia, quibus carendum est illi. Nec vero simul una et altera in re sefellit expectationem tuam, debes odisse locum et fugere velle. Nusquam agitur tam commode, ut non sit, quod desideres. Si vetaris integra opera exsignare, at non vetaris conferre, quod quidem utilius puto quam talia, ἄῤρον πολὺν, describere. Praeterea propitium habes Thuaneae praefectum, et habere potes defensorem Stagiritae, Mazariniana, opinor, ἐπίσκοπον. Nihil etiam dum narraſti mihi de S. Victoris scrinio, unde Vegetii Mulomedicinae

alium vulgato titulum et partem ineditam ostentant ὁ Χρηστός τε καὶ Ἀλώπηξ. Qui lividos concinnat et timidos, quorum equis durateis vexilliferis invidet, in eo recordare Terentianum: *Sic, Crito, est hic. mitte.* neque ipse tantum, sed et omnes populares ejus. Stulte facies, ista te si commovebunt. Vis tu ad talia aequiore animo ferenda cogitare, te patriam sortitum orbem terrarum, et eorum hominum esse, qui te cum maxime circumstant, et quod illi dicunt de quibuscumque aliis, id ad te nihil pertinere. Nummis si eges, quid moraris ire petitum? Non enim tantummodo in eam summam, quam exegisti, sufficit, quem tecum tulisti, symbolus: nec si quo librorum indiges, emere te prohibui. De Gellio recte: XIV posteriores libros habet Regalis circa num. DCLIX aut LX. hujus quoque formam mihi pingas velim et principium finemque perinde ut alterius, Lambecius narrat a Mazarinâ se habuisse Romae ¹⁾ impressum ab Aldo Manutio a. 1469 et Venetiis a Nic. Jenfon 1472. Inquire sodes: de utrovis enim dubito: sed maxime de priore: et primam editionem puto Romae 1472 a Conrado Sweinheim et Arnoldo Panartz factam. Quia intelligis Gallice, mane, ubi es, vel ob unam eam causam, ut et loqui discas; non enim hoc repente contingit, sed multo tempore et incrementis latentibus. Nec si qui videntur ineptire tibi minutias linguae patriae confectando et plausus inde captando, morose ac rustice fastidias, sed laudes

1) Editionem Auli Gellii principem e domo Petri de Maximis Romae 1469 in lucem prodiisse palam est. Splendidum hujus editionis exemplar Bibliotheca Universitatis nostrae inter sua Cimelia conservat. Anno 1472 duae hujus authoris editiones prodierunt Romae ap. C. Sweinheim et Arn. Pannarz. Venetiis p. Nic. Jenfon.

fortunas illorum, quibus hoc licet. nos ab hac φιλοκαλία longe remoti sumus, quos ne serio quidem de literis agentes quisquam audire, nedum laudare, sustinet. Si Cordeſius aut Mentelius ſupereſſent, librorum editorum uſu non careres. Forte aliquis in illorum hanc comitatem ſuccedet. Vale et homines ferre, tuamque impatientiam vincere diſce. Ad Dretincourtium et Plaium ſunt curatae. Iterum vale et nos tecum Deo commenda. Poſtridie quam tuas accepi a. d. xv Cal. Quinctil. 1671.

XXX.

A Monſieur

Monſieur Gronovius,

chez Monſ. du Buiffon maître d'hoſtel de Monſ. d'Aligre
dans le petit hoſtel de Monſ. Schomberg rue Bailleu
port.

A Paris.

Ex epiſt. Steph. Morini Cadomenſis Theologi
14 Cal. Jul. Polybius ſane indigebat illuſtratione:
et in Gr. textu et in verſione Caſauboniana non
pauca deſiderantur. In verſione quidem accuratio-
rem verborum poſſe adhiberi delectum putarem.
An tibi quaero probatur q. pag. 85. πεπτευτῆς red-
ditur *aleator*? an convenit Polybii prudentiae im-
peratoriam Amilcaris peritiam cum temerario
aleae jactu comparare? Ego putarem ad ludum
calculorum potius alludere, in quo ars et judi-
cium ſuas agunt partes. Nescio an non etiam ver-
ſetur in errore p. 329, ubi agens de Oeniadis ait op-
poſitam habere in Peloponneſo Dymaeorum oram,
et proxime abeſſe a vicinis *Avaxo* locis, cum

vix sint in medio C stadia. At longe plura sunt stadia inter Avaxum et Oeniadas. Ut igitur veritati litaret, forsitan scrib. esset non ab Oeniadis, sed ab ora Dymaeorum proxime abesse vicina Avaxo loca. Sic pag. 422 προσαναλαβὼν τὴν δύναμιν significare videtur, *Copias cum refecisset*, non vero partem exercitus assumptam. Sed quod subit mirari, saepe discrepantes exhibent lectiones Latinae et Graecae paginae, ut p. 323 in textu Δορίμαχος, in vers. *Archidamus*, melius procul dubio, si tunc enim perisset Dorimachus, quae postea narrantur, non gessit. P. 326 in textu τέριον vox nihili, in versione exponitur πεδίον planiciem. Pag. 389 Atropatios habet pro Σατραπείοις. Praeterea nonnunquam addit textui necessarias voces versio, ut pag. 428. ἐνιαύσιος, interdum plures lineas male supprimit, ut p. 304. At pag. 92 optime supprimit vocem Αἰτωλῶν, quae extat in textu, ubi de Mydioniis (quorum raro occurrit nomen) et eorum decreto circa τὴν ἐπιγραφὴν ὅπλων. Ex textu enim Graeco sequitur victores Mydionios honorem detulisse Aetolorum praetoribus debellatis, quem reb. integris denegassent, quippe qui noluerant Aetolicae reip. adjungi. Mens itaque Polybii fuit victores Mydionios statuisse, ut sui praetores tam anni praeteriti quam novissime inchoati inter se partirentur τῆς ἐπιγραφῆς honorem, quemadmodum prius decreverant Aetoli hac ratione bipertiri debere a suis. Mitto longe plura, quae explanata fuisse a filio suo nullus dubito etc. Cl. Rapini consuetudinem gaudeo respondere versibus, quibus, dum ad vivum pingit, ipsam naturae vicit amoenitatem. Eum plurimum et officiose a me saluta, ut et nobilissimum Lamonium, cujus memoria et observantia, ex quo hic eum vidi, apud me non desit

excubare. Salebras Tertull. habeo. non sunt ad stomachum τοῦ πάνυ. si jubet tamen, indiculos capitum lubens mittam. De Blondellianis nescio quid simile in strepitu audisse me memini. sed inquiram. De ergastulis omnia veterum plena. scriptores rei rusticae. bella servilia Euni et Athenionis. ipsum illud, *ne praeter casam*. Horatii ad Davum, *accedes opera agro nona Sabino*. Sed nondum video, quid in eo peccarit, quem notas. Hadriana visitatura avum profecta et bene excepta est. Alii te salvere ac valere κηρόδι jubemus. Nonis Juliis 1671.

XXXI.

A Monsieur

Monsieur Gronovius,

chez Monf. Buiffon maître d'hôtel de Mr. d'Aligre
rue Bailleu dans le petit hôtel de Luxembourg

port.

A Paris.

Pater filio desideratissimo desideratissimam
salutem.

Consauciatus ipsum pectus binis tuis respondeo non tam quia libido scribendi et argumentum est, quam ominis ipsius causa et qualiscumque solatii tui, ne tuum periculum segniter excipere nos putes. Quid enim scribam, nisi, quod nosti, vehementer angi nos vicem tuam, et vota facere, et tibi suadere, uti, quantum potes, valetudinem cures, atque interim sanctissimo Creatoris arbitrio te totum permittas, ejusque pacem medio Jesu te impetrasse confidas. Ille providebit, ille faciet: et si nobis bonum, ipsi amplum est, nos

his aliquando quoque, fin, melioribus, nec tam incertis infestisque sedibus conjunget. Interim vince dolores, vince animum, et sic te para, ut et evocanti pareas libens, et si proroget hanc stationem tibi, hoc ipsum ames, et vivere velis, nec temere spem abjicias. Unum etiam, licet abhorrens, monuerim, circumspicias, cui chartas (si quid humanitus fiat, quod Deus avertat) tuas, imprimis Polybianas, commendes, ne in malas manus veniant. Sed spero fore, ut haec cura inanis fuerit. Accepi ex Anglia literas ad te perhumanas Lloydii, et mittam ad primum meliorem, quem auguror, de te nuntium. Accepi et a Bernhardo postulante τὰ Θεωρητικά, tanquam in vett. Mathem. per 16 volumina edituro. Quis sit, quod ingenium, quae dignitas, me docebis. Blondelliana describuntur hac fini, ut praelo commodius possint dari; data tamen nondum sunt. Deus misereatur tui et omnium nostrum per filium aeternum et μονογενῆ, redemptorem nostrum, enixe rogatus. Lugduni a. d. XI Cal. Sextiles. A. C. MDCLXXI.

Gudius honores nactus in Holsatia ibi manebit. De Raedt Professor Theologiae extraordinarius Hardewici. Francium nemo nostrum vidit. An Lindius te nunc fugit, ubi Durenus? Si indiges ope nostra, impetra, et nusquam tibi erit in me mora. Vale, Vale, Vale frater φιλώτατε De Bye Hagensis J. V. D. est ex comitibus legati, utinam ejus amicitiae te insinues.

XXXII.

A Monsieur
Monsieur Gronovius

chez Monf. Buiffon maître d'hostel de Mr. d'Aligre rue
Bailleu dans le petit hostel de Mr. Schomberg.

A Paris.

Pater δευτερόποτμος Filio δευτεροπότμῳ
propriam salutem.

Non dimisi tamen sine meis praeterquam hebdomados praeteritae cursorem, quum nec a te quicquam allatum foret. Quid autem scriberem postremis tuis confusus et in perpetuo angore spiritum aegrum trahens, ac ne verba facerem non responsuro veritus? Satiùs consultiusque rebar de te cum Deo opt. max., quae nunquam non exaudirentur, quam tecum, quae poterant intercipi et inania cadere, loqui. Et tamen accepisse debebas, quas a. d. XI Cal. Sext. dedi, in quibus mentionem Bernardi et Lluydii et Blondellianorum feci: etsi ex neutris, quas III et prid. Cal. expeditisti, id appareat. Sed omnia bene habent, postquam misertus est nostri ὁ ἐλεήμων καὶ οἰκτίρμων καὶ μακρόθυμος καὶ πολυέλεος, cui χάρις καὶ δόξα εἰς τοὺς αἰῶνας. Cl. Stegelius hoc ipsum providit, in quo ego maxime aestuabam, ne nimio sanguine hausto non tam morbum, quam vires ad vincendum morbum tibi minuerent, quae res multis illic nostratium magna mercede constitit. Fac salutes eum meo nomine quam humanissime, non modo tanquam civem et amicum, sed tanquam secundum coeleste numen σωτήρᾱ καὶ Διὸς ἄγγελον. Laudo etiam sedulitatem et nutrimum optimae matronae hospitae tuae, et ut suae pietatis praemia ferat amplissima, precor. Sed

quia jam pedibus te portas tuis (etsi tertio non tuo et impari videaris uti) cave transversum digitum in publicum exeas aut commentando te fatiges, nisi plane confirmatus. De sumptibus *εὐδυνος γένοιο*. Non sine sacris haereditas. Et ideo genium saepe fraudavimus, ut per duriora tempora sustineremus. Tu modo curis nunc omnibus nuntium remitte, ut amissum corpus recipias; dein vive, ut solitus, ita tamen, ne injuriorem fascem, quam valetudo ferat, humeris imponas. Si Cadomum scribes, da operam, ut acre verum mitissimis verbis temperes: praestat bonum virum, licet minus subtilem, amicum quam inimicum reddere. In meo Casaubono est, *biduo prius, quum rus esset profectus*, eodem sensu, quem tu facis. De Apega nihil habeo dicere. Fasciculus ab Orthio missus quin dudum sit in Gallia, non dubito: sed utrum ad praebitorem tuum an vetus hospitium destinatus sit, non memini; nec resciscere possum, antequam Orthius, quem Brunsvicensis ignavia ad spectaculum sui traxit, domum redierit. In duro janitore unum metuo, ne injuria offensus oderit magisque noceat. Non tamen veto te ab illustri Capelano consilium petere. Dic quod verum est, non posse te capere, quâ res tam absurda homini venerit in mentem. Si Maninae Carpetanorum aut Byzantii hoc audiretur, excusatum fore, prorsus enim ἀπὸ Σκυδῶν ῥῆσιν esse, indignam divino et gloriosissimo rege, indignam Principe ministro tanto literarum patrono, indignam politissima gente, indignam matre studiorum Lutetia. An qui tantos thesauros quotannis erogat in studiosos sine discrimine nationum, eum bibliothecam peregrinis claudere? unde nihil a quoquam mortaliū aut ubicumque locorum proferri possit,

quod non sit cum gloria Domini et laude custodis conjunctum. Quid si talis sit auctor, quem Franci fastidiant ipsi, et nemo sua opera dignetur? Haec ita cum viro sapientissimo et nobis benevolentissimo communices velim, ut, si iudicet ille praestare non moveri Camarinam illam et remedio plus inesse periculi quam malo ob gratiam hominis, fileas et aequo animo feras unius desiderii inopiam. Soror libertatem tuam non degenerat. De indebito, nihil adhuc: interim matertera tua semel iterumque pullos gallinaceos misit quasi interusurium. Ὁ μουσοπóλος Batavus in Anglia peregrinatur. Meignero persolvi 59 flor. quos G. Langermanno deberi ajebat, 9. Julii, de quo forte non male feceris, si ipsum G. per causam salutandi monueris. Vale et verum praesta illud Menandri: Μακάριόν ἐστιν υἱὸν εὖτακτον τρέφειν. Lugduni Nonis Sextil. anno τῆς χριστογονίας 1671.

XXXIII.

A Monsieur

Monsieur Gronovius

chez Monf. Frederic Micheelsen chez Monf. Pettevin apothecaire au faubourg St. Germain.

A Paris.

Pater filio S. P.

Ego vero minimum te istic hiematurum putabam, ut et comitatus splendorem videres et usum, ac peritiam sermonis confirmares. An dubium est, quam tenuem parasti linguae consuetudinem, si tam celeriter intermittatur, nihilo fidelius haesuram tibi, quam si in ipsa Lethes

aqua eam scripſiſſes? Et neſcis, num quid aliquando prodeſſe tibi poſſit iſtos homines et magis pluresque noſſe et magis pluribusque te deſiſſe noſcendum. Sed et Italicae linguae aliquid interea temporis operaeque te impertiri vellem, ne ingrediariſ eas terras, priuſquam incolas appellare poſſiſ. Verum tu, ſpe una, quam tibi nimis et ſpecioſam et certam propoſuiſti, decolante, odiſti locum, unde biſ ego non niſi invitiffimus ac propemodum flens olim abſtrahebar. Vide igitur, ut bene poſueriſ calculoſ et ratio tibi conſilii conſtet. Quam utcumque parum capiam, tamen deſiderio tuo, ſi perſeueras, non repugnabo, et agam cum Plaïs, ut praeſtent tibi Florentiae, quod nunc Lutetiae. Neque impediam, quo minus exigas, quod ſtatuiſ, viaticum. Sciſ anguſtias noſtras non multum patere: quod poterit tamen et juſtum eſt, non negabitur vobiſ. Sortem interim forte neceſſe eſt, qualiſ eſt, noſ ferre, nec de illa extendenda cogitare: ſed haec ſi non minuitur, Θεοῦ ἀντιſτηριζοντοſ ſatiſ ſtamus. Nam lucella, quae quondam, nec adfectare faſ per ſeneſcentiſ corporiſ torpore, deſertorem animi, nec conſequi per mutationem temporum. Sed hanc mihi permiſſe curam, tu unum nava, ut, quod animo majore quam viribuſ datur, diligenter et prudenter impendas. Slegelio, quod eſt apud me Silvianarum diſputationum, colligam, et in mundo erit. De Gelliſ Mazarinianiſ ne ſiſ ſollicituſ: fucum enim nobiſ factum cenſeo, nec ab Aldo quicquam 1469 editum, qui tum aut erat, ubi *non nata jacent*, aut equitabat in arundine longa. Sed Tornaefianum codicem appellant Lambeciuſ et Thyſiuſ, et locupletior utroque teſtiſ Fr. Juretuſ ad Symm. 1, ep. 7, adductiſ Gellii verbis ex 17, 9. Eo modo, inquit, anti-

quus et MS. codex Tornaesii, ut ille fatetur in sua editione. Vide, quaeso, an sit istud exemplar inter minores Lugdunenles 1515, 1546, 1550, 1587, et num quid sufferti tinniat. Vale et tibi nobisque Deum et Christum ejus precibus indefessis propitia. Lugduni a. d. XIII. Cal. Septemb. 1671.

XXXIV.

A Monsieur

Monsieur Gronovius

chez Monf. Frederic Micheelsen rue St. Margarite chez
Monf. Pettevin apothécaire au Faubourg St. Germain

A Paris.

Pater filio peramato S. P.

Slegelius opportune salvus adfuit; depositum utrumque reddidit; quod me penes erat Silviano-
rum, accepit; hospitium oblatum recusavit, quod sibi horam intra conscendendum diceret. Hoc nudius octavus scisses, nisi me impedissent hospi-
tes, Trajecto quidem grati et suaves, sed ille re-
dux e Britonibus ita discessit, ut diu coercitum venenum in me rursus effunderet. Hoc tamen parum me afficit, qui jamdudum certum habeo, dum vivet, similem fore sui. Orthium per Fai-
thium de fasciculo appellavi. Audieram in Che-
ruscos profectum: an redisset, ignorabam. Et primum quidem domo etiam aberat: dein salu-
tatus lecta epistola, in qua nomen utriusque di-
versitoris, quo illic usus es, pollicitus est, cis paucos dies desiderio tuo satisfactum iri. De
Cnido *ἡύστοχρησας* apud utrumque. *Βάλλ' οὕτως*.
Nec nequicquam dubitas de altero Polybii loco.

Vertendum enim: *Quis enim ista causas existimet, ante quae* (ὧν πρότερον, vel quae priusquam exsistere) *Alexander multa, nec pauca Philippus etiam vivens egerant palam comparaverantque belli cum Persis habendi causa. Similiter Aetoli cum Romanis ante adventum Antiochi.* Ταύτας αἰτίας accipiendum, quasi esset, ταῦτα αἰτίας ὑπάρχειν, elegantia Graecis et Latinis usitata, de qua ad Sen. Conf. Marc. cap. 19. Neque aliter illud σεβασμιώτατον: τοῦτό ἐστι τὸ σῶμά μου· pro οὗτος scil. ὁ ἄρτος. Τὸν δεῖνα mihi de indole tua et industria gratulatum esse meminisse poteras ex ipsius epistola, quam hic, opinor, vidisti. Itaque merita ei humanitate respondi. Quia decrevisti satis ἐν Καρὶ te πείρας fecisse, age sane, cum Deo benevolente collige sarcinulas, et eo te confer, ubi speras, Musarum aedituentes non tam καρχάρους nec barbaros fore. De viatico, quanto sit opus, melius illic rationem inibis aut ex aliquo ejus viae gnaro explorabis. Pecuniae ut multum feras, non suaferim, sed literulas collybificas per celebriora, quae transibis, oppida, usque ad illud, ubi sedem destinās. Itaque fac in antecessum omne iter descriptum habeas, et agas cum praebitoribus, si, qua necesse et commodum erit, eis te possint instruere. Ego jam cum Plaïo locutus sum, et promisit ille mihi, per ipsum cursorem, qui portabit has tibi, se daturum mandata, ut illi, prout poterunt, tibi serviant; et sicubi non poterunt, aliter tibi consulturum. Non longe distat Florentia Portus Herculis Liburni, vulgo Livorno. ibi se habere perpetuum commercium. Francius Amstelodami apud suos desedit. nondum vidit me. Scripturam nummorum et lapidum nobis antiquissimam censeo esse debere, ubi defendi potest nec manifeste

vitium apparet. Deus tecum cum Christo suo et Sancto Spiritu, hoc est εἰς ó "Ων. Lugd. a. d. iv. Id. Septembr. ante quem die quarto natalem agebam sexagesimum.

Non te gravis uret illic impletarum sarcina quarundam chartarum, quibus in concursatione, quam moliris, carere potes, quibusque huc missis et apud nos depositis (ut Anglia relictā fecisti) ambules expeditior? Vide, et quod commodissimum videbitur, consule.

XXXV.

A Monsieur

Monsieur Jacques Gronovius

chez Monf. Buiffon maistre d'hostel de Mr. d'Aligre rue
Bailleu dans le petit hostel de Mr. Schomberg ou chez
Mr. Frederic Michelfen rue St. Margarite chez Mr.
Pettevin apothecaire au faubourg St. Germain
par amy que Dieu veuille conduire

A Paris.

Pater filio S. P.

Curatae sunt, opinor, quas ante dies quatuordecim ad te dedi. Ex eo haud ignoras Slegelium et me officio mutuo functos, hoc est, me ab illo Gellium, illum a me Silviana accepisse. Orthium spem dedisse, te libros haud diu desideraturum. me liberum tibi fecisse, manere velles an migrare, et rationem iter instruendi commonstrasse. Ad eas per cursorem, qui nuperrimas attulit, responsum expectabam, eo avidius, quia ob tuam deliberationem momenti nonnullius et ego animi pendeo. Quia nihil apparebat, constitui et ipse differre, quod erat argumenti, eo usque dum

per intervenientes tuas augeretur. Mutavit consilium patruelis tuus obortus ante exspectatum et visus multo elegantior exspectato, dignusque quem sperata fama forma pecunia(?) honesta speret. Curam igitur ei et operam, ut inter vos decet, impertieris. A Falanio et a Wichelio chartas accepi. Sed τὸν δεῖνα, qui minorem fasciculum dedit (si suspicaris aut resciscere potes, qui sit,) fac sciat, me id genus illi conquirendarum, habendarum, mittendarum gratiam facere. Non venit in mentem, quorum confederit arvis. Satis est τῶν παραβόλων jocularia mala ultro arcessentium et caput opponere quam dictum perdere praeoptantium. ne ille hunc numerum augeat. Periculosum est, venena tractare, quamvis nemini misceas. Quo pignore certum habet, inter ipsos, qui talia spargunt, non obrepere ποταγωγίδην aut ὠτακουστήν; Caveat immo malo, et ne aurem quidem commodet irritantibus, qui τῇ μαχαίρᾳ solent ἀντιμυκτηρίζουσαι. Meministi, quae fuga dissiparit forte temere audientes. Sub terra tonuisse putes? Bonum igitur factum, ut haec moneas, si modo bene nosti hominem, quod vehementer ambigo. arduum enim. Non peribunt tamen, quae illi per te praecipio: nam et te sicut adhuc fecisti, exemplum istud vitare et lasciviam procul habere cupio. Cl. Bullialdo multum debeo, cum tam liberaliter τῆς λογαρικῆς copiam facit, sed puto me habere ἀρτίαν, ὀλόκληρον, nam τῷ Τέλει σὺν Θεῷ τῶν λιτρισμῶν subjungitur et περὶ τῶν λεπτῶν τῆς λίτρας. Si jus illi esset in dominicis scriniis, ut erat, cum ego ibi peregrinabar, nihil esset, quod quereris. Jube salvere meo nomine plurimum et talium tot virorum jucundissima consuetudine unius, non malitiam aut invidiam, sed ἀπαιδευσίαν omnia tuta metuentem leva et solare. Macrobia.

num heroem in luminis oras reductum gaudeo. Si quotidie talem lineam duxeris, brevi eris Apelles. *"Ερρώσο καὶ πρῶτα Θεὸν τίμα.* Lugduni a. d. VII. Cal. Octobr. A. C. CIOCLXXI.

XXXVI.

A Monsieur

Monsieur Gronovius,

chez Monf. Frederic Michelsen rue St. Margarite chez
Monf. Pettevin apothecaire au fauxbourg St. Germain
port.

A Paris.

Pater filio S. P.

Ergo nondum videras patruelem prid. Nonas Octobres, quo die dedisti, quas accepi nudius tertius? At ille prid. Cal. hinc discefferat recta ad vos. Humanitate ista cuiquam de viatico tuo impertiendi, quamcumque fidem dent, in posterum, jubeo, abstineas. Equidem hoc perditum duco, plane, ut ille ait, non obnoxie. Ubi istum terrae filium requiram? Satin' indulgendo aliis et male miserendo ingratorum perimus ipsi, certe nobis aerumnas accumulavimus? Posthac si quid pudoris habes et meam in te liberalitatem non vis claudere, nec cautiones hujusmodi mihi mittas, nec sciat omnino quisquam, tibi vel tantillum superesse, quod cum alio communicare possis. Quem vasis collectis salutasti, vereor, ut nequidquam coelum mutet, utpote, quae illic molesta sentit, ubique inventurus, immo ipse quovis secum portans: neque aliud illi consilium, quam ut semet ipse effugiat, hoc est, animum ac mores mutet. In eis, quas Wichelius attulit, (ob quas ver-

so nomine scis de quo fabula nuper tibi narrata fuerit) ambigere etiam videbare: sed quia satietas te et taedium praesentium percepit, i, sequere Italiam cum Deo benevolente. Mandata quid me poscis, cum non ignores, quibuscum commercium est aut fuerit mihi, esse oppido paucos? Florentiae tamen Carolum Datium, Lauren. Magalottium, Pantiaticum, Nic. Stenonis, viros nobiles et humanitate dubium an eruditione praestantiores, quorum suffragatione nisi patebit maximi Principis literatus thesaurus tibi, nihil in me opis. Octav. Ferrarium, si et Patavium accedes; si Veronam, Otholinum et Angelum Floratum; si Genuam, Angelicum Aprosum Vintimigliam; in domina urbe Athanasium Kircherum, ubi nec injustos, opinor, reperies Gradium et Falconerium, quamquam adhuc nullo officio meam illis observantiam probare potuerim. Et merito quidem obeuntur tot illustria oppida, tentanturque et quae istuc et quae Venetiis atque inprimis Mediolani bibliothecae: sed unde tibi in illas aditus? ne addam, unde sustinebimus impendia? Lucella minime procedunt, ut antehac: tum minantur indies se correpturos fructum creditae publico pecuniae; et jam quadamtenus reciderunt. Ego tamen, quod potero, non demam tibi: modo diligenter eroges, nec tam prodige, ut istas sedecim uncias. Sed fortassis haec cura supervacanea est, et stomachus iste quo festinantius inde te auferet, eo etiam celerius domum reducet. nam si hos obviae comitatis et omnem statim sensum effundentes homines ferre non potuisti, quid facies deprehensus sub lentis maxillis tectorum, severorum, pauci et meditati sermonis, nec nisi diu multumque spectatis et fastum passis conciliari solitorum? Utcumque cadat, sis modo salvus

et honestus, citius an tardius revisas nos, parum interest, et cupio omnia, quae vis. Deus opt. max. per redemptorem nostrum enixe rogatus, te regat spiritu suo, et tibi comites adsignet angelos custodes. Tu quoque, quomodocumque se habeant caetera, fac assiduus sis in precibus, et quicquid ages, quicquid molire, et illum et illos coram atque in te intentos esse cogites, nec volens sciensque cujusquam delicti tibi gratiam facias. Vale *προσφιλέστατε καὶ εὐημερῶν διατέλει*. Lugduni Idib. Octobr. CIO DCLXXI.

In Tuscis pluteo 61, codice 9 et 21 invenies Polybium tuum. Somnium Scipionis Graece versum plut. 80, cod. 24. Arriani Expeditionem 70, 1 et 9 et 24 et 28. T. Livii bellum Hannibalicum plut. 63 vetusti et optimi exemplaris, ex quo excerptas varias usque ad lib. 2. cap. 6. *objectis scutis arcuere*, communicavit mecum Gudius; ego vero totum acerbissima intentione collatum vellem. Plut. 59, 45 et 86, 25, Dionysii Thracis τὰ Γραμματικὰ omnium antiquissimi ejus generis, quae magno ambitu tota vita promisit Mauffacus. 86, 3 Marinum de vita Procli, multo emendatiorem et auctiorem, quam sunt vulgati. Nec Apulejum plut. 68 ita diligenter a Lindenbrogiis collatum Jos. Mercerus putavit, ut non dignus esset, qui rursus contenderetur cum edito. Jam de mensuris et ponderibus plut. 7. 19. 57, 42. 60, 16. 75, 6 et 13. 86, 16. quae si differunt, omnia describi velim. Mediolani ajunt Augustam Historiam Spartiani, Lampridii etc. longe esse excellentissimam. Audi et Romae praedicari Glossas, quibus Heiderbergae usus Salmalius, qui et maximi eas fecerit etc.

Has complicabam, cum mihi redduntur perbreves, quibus illustris Capelani ad Hogersium

amplissimum incluferas, haud scio unde allatas; nam sestertium nummum vecturam exegerat puella, quae portaverat. Illas statim curavi. Male sit τῷ καρχαρόδοντι, qui gratia, qua indignus est, tam improbe utitur. Consilium tuum agendi cum Cl. Bigoto haud improbo, iterum vale.

XXXVII.

A Monsieur
Monsieur Gronovius

chez Monf. Frederic Micheelsen rue Ste Margarite chez
Monf. Pettevin Apothecaire au fauxbourg St. Germain
port.

A Paris.

Pater filio S. P.

Mullenhofius Macrobiū reddidit, nummos intra dies quatuordecim promisit. Exspecto, ut satisfaciāt, et, si manserit in fide, id in lucro ponam. At tu de quovis alio in posterum tam bene sperare et censum vel tuum vel patris jacitare noli. Ῥαπιζόμενον ἐκβάλλεσθαι quotidianum Romae in mimis spectaculum. Cicero pro Caelio, 27. *Mimi ergo est jam exitus, non fabulae, in quo cum clausula non invenitur, fugit aliquis e manibus, deinde scabella concrepant, aulaeum tollitur.* Fugit, sed non nisi bene Ῥαπισθεῖς. Juvenalis Sat. 5. *pulsandum vertice raso Praebebis quandoque caput.* Martialis 2. epigr. 72. *quanto non ipse Latinus Vilia panniculi percutit ora sono.* Et. 5, 63. *dignus eras alapis, Mariane, Latini.* Tertullianus de Spectac. 35. 2. *Placebit et ille, qui vultus suos novacula mutat infidelis erga faciem suam, quam insuper contumeliis alaparum sic obicit* etc. Arno-

bis lib. 7. *Delectantur, ut res est, stupidorum capitibus rasis, salpictarum sonitu atque plausu, factis et dictis turpibus.* Quem locum attingi ad Plinium 35. 2. Hinc illud *os praeberet contumeliis.* Non dubito, quin huc respexerit Marcellus, et facile crediderim, inter tot quoque Graecorum ludicra id frequentatum et ab his accepisse Romanos, quod videtur significare locus Diogenis. De lacuna Polybii nihil video promptius, quam ut agas cum aliquo librariis, quicum isthic nostratibus illis commercium est. Si sedet non hiemare; ubi es, (nec tutum id credi sinunt, quae undique nobis minantur) effuge in Allobrogas aut Helvetios, et ibi subsiste interim, ne in Alpibus transeundis tali tempore labores. Basileae habent aliquid Mss., cujus forte copiam tibi faciet humanitas Buxtorffii. Bernae Bongarsianam, membranis, ut ajunt, locupletem: sed haud scio, num quis in eam aditus. Tiguri, opinor, doctus ille atque elegans Theologus Heideggerus, cui dicatus Agathemeros, viam monstrabit. Etiam eadem in urbe habitat Drelincourtius medicus nostri frater, quicum hic mihi juncta amicitia est. De viatico, bono sis animo. Quamdiu nobis erit (quod hodie legebam inter prima pensa diei Βασιλ. γ. κεφ. ιζ'. στιχ. ιβ') δραχμῶν ἀλεύρου ἐν τῇ ὑδρίᾳ καὶ ὀλίγον ἔλαιον ἐν τῷ καψάκῃ, quod suppeditabit, tecum communicabimus. Soror tua e Saliis per tres amplius menses vana spe lactata rediit; de restituendo indebito somnium: ipse ille, qui apud te tam aequum se simulavit, ei aperte dixit, ejus, quod socer dedisset, repetitionem sibi justam non videri: se tamen, si alii cohaeredes indulgeant, non obnixurum. Cui talis est in minima summa, qualis erit in maxima? Ego gustum recuperare nequeo, et plerasque

2

Q

noctes duco infomnes. Itaque languero identidem, et omnium rerum, non tantum libellorum, fastidium oboritur. Nudius etiam tertius impetum tertianae a quinta vespertina usque ad decimam expertus sum. Operas quoque igitur, quod Tacitum attinet, hac de causa jam hebdomadem feruari jussi, nunc magis festinantes, quia propius metam prospiciunt. Et quia pars melior anni quassato huic corpori nihil profuit, in reliquo spem exiguam habeo. Γενηθήτω δὲ τὸ δέλημα τοῦ κυρίου, ἕως οὗ ἥκει ἡ ὥρα (ὥρα) αὐτοῦ. De Polybio Scaligeri, simul atque transtulerit e Sueonibus bibliothecam Heinsius. Cl. Bigotio non ingratum fore adventum tuum scio ex literis, quas antehac ad Heinsum scripsit. Vale καὶ τῆς τοῦ γονέως (γονέως) εὐχῆς ἀξία φρόνει. Lugduni a. d. IV. Idus Novemb. MDCLXXI.

Patruelem tuum adhuc expectamus. Hugenius Arenacensis junior, Francius, Crucius, Richius te plurimum salvere jubent.

(In schedula majori) T. Livius Jo. Antonii Campani est, nisi fallor, in regia bibliotheca.

Ego vidi nunquam. interim haec quoque editio, quam temporis, loci, librarii, dedicationis (nec nisi nomen intelligo ejus cui inscripta est) notam praeferat, scire velim.

Cl. Salmaf. ad Sol. 770. Auctor qui sub Aethici nomine vulgatur etc. Ita legendus ille locus ex vetustiss. nostro codice et Thuaneo, qui Cosmographiam illam non Aethico, sed Julio Oratori tribuit, cujus meminit Cassiodorus. Nam Aethicus alius est Histricus Sophista, quem de Graeco translatus ab Hieronymo et nondum editum vetus idem liber habet ex bibliotheca Thuanea. Mart. Opitius ad Rhythmum Germanicum de

Annone (?) pag. 20. Hister sive Ister Aethici cognomento, scriptor antiquissimus, cujus Edicta Cosmographica, e Graeco ab Hieronymo saltuatim versa, in Thuanea bibliotheca Lutetiae, penes me quoque exstant, litera sane antiquissima. De Hieronymo si alia desint, dubitare nos vetat Hrabanus Maurus in libello de inventione linguarum.

Potes videre quid sit? et an tibi usui esse possit. Quem publicatum habemus Aethicum, adhaeret Dionysio, Melae, Solino Hen. Stephan.

(In schedula min.) Hodie Plais etiam fratribus satisfeci 540 fl. Hollandicis.

Mantua Carpetanorum Madrit en Espagne. Quid si repente signa canant? Poterisne decedere cum legato et reverti domum, an te subducere Coloniam Allobrogum?

P o s t s c r i p t u m .

Variis impeditus muneris mei laboribus uberiores, quas ad frontem libelli promisi, notas dare non potui. Spero tamen, pauculas hasce epistolas literarum fautoribus adeo jucundas fore, ut mox et plures desiderentur, quas porrigere non intermittam, et quibus annexere notas residuas sincere promitto. Vale, Lector benevole! et primulis hisce benigne fave!

H.

Empfehlungswerthe Schriften
der Joseph Thomann'schen Buch-, Kunst- und
Musikalien-Handlung in Landshut, welche in allen
Buchhandlungen zu erhalten sind:

Aeschylos Prometheus, Sophocles Antigone und
Euripides Medea, mit einem Wörterverzeichniß etc.
 von Dr. Fr. Alt. gr. 8. 1 fl. 48 fr. od. 1 Mhr.

Alt, Dr. Fr., Entwurf der Universalgeschichte.
 2te vermehrte und verbesserte Auflage. gr. 8.
 2 fl. 42 fr. od. 1 Mhr. 15 gr.

— — **Grundlinien der Grammatik, Hermeneutik und Kritik.** 8. 1 fl. 15 fr. od. 18 gr.

— — **Grundlinien der Philosophie.** 2te verm.
 Aufl. gr. 8. 1 fl. 3 fr. od. 16 gr.

— — **Grundriss der Geschichte der Philosophie.** 2te vermehrte und verbesserte Auflage. gr. 8.
 2 fl. 24 fr. od. 1 Mhl. 12 gr.

Buchberger, Al., themata disposita juventuti
laudis oratoriae appetenti, adjecto subsidiorum promp-
tuario. 8. 1 fl. oder 18 gr.

Burger, Dr., Leitfaden beim Unterrichte in der Erde-
beschreibung zum öffentlichen u. Privat-Gebrauche. Mit
 3 Karten. 8. 42 fr. od. 10 gr.

Cäsar's, Kaj. Jul., Werke nebst den Büchern über
den alexandrinischen, afrikanischen und hispanischen Krieg.
 Verdeutscht und erläutert von M. J. Volmer. gr. 8.

Cicero, Mark. Tul., vom Greisenalter und von der
Freundschaft. Verdeutscht und erläutert von Dr. C. Roth.
 gr. 8. 36 fr. od. 9 gr.

Lehr- und Erziehungsplan, der Societät Jesu, treu
dargestellt und mit Bemerkungen begleitet von dem Ver-
fasser der Grundprinzipien etc. 2 Thle. gr. 8.

Hofchea, der Prophet, treu aus dem Hebräi-
schen übersetzt und mit Anmerk. erläutert für kathol.
höhere Lehranstalten von Fr. W. Goldwitzer. gr. 8.
 48 fr. od. 12 gr.

Mußl, Seb., lateinische Schulgrammatik. 2te stark
 verm. u. verb. Aufl. gr. 8. 1 fl. 36 fr. od. 1 Mhr.

— — **Elementarbuch der lateinischen Sprache**
zum öffentlichen u. Privatgebrauche. 1ter Curs. gr. 8.
 39 fr. od. 10 gr.

— — **Blumenlese aus spanischen Dichtern.** Mit
 einem Titellupfer. 8. 1 fl. 48 fr. od. 1 Mhr. 2 gr.

Tacitus 26

Virgil 34

Vitruvius ²⁵ vases de Louis p. 42

Quintilian 44

Apuleius 47. 73

Liuius 49. 73

Gellius 54, 58. 66

Vegetius 58

Polybius 59 14. 64. 67/7 76.

Isidoreus ¹⁴ ¹⁵ ¹⁶ ¹⁷ ¹⁸ ¹⁹ ²⁰ ²¹ ²² ²³ ²⁴ ²⁵ ²⁶ ²⁷ ²⁸ ²⁹ ³⁰ ³¹ ³² ³³ ³⁴ ³⁵ ³⁶ ³⁷ ³⁸ ³⁹ ⁴⁰ ⁴¹ ⁴² ⁴³ ⁴⁴ ⁴⁵ ⁴⁶ ⁴⁷ ⁴⁸ ⁴⁹ ⁵⁰ ⁵¹ ⁵² ⁵³ ⁵⁴ ⁵⁵ ⁵⁶ ⁵⁷ ⁵⁸ ⁵⁹ ⁶⁰ ⁶¹ ⁶² ⁶³ ⁶⁴ ⁶⁵ ⁶⁶ ⁶⁷ ⁶⁸ ⁶⁹ ⁷⁰ ⁷¹ ⁷² ⁷³ ⁷⁴ ⁷⁵ ⁷⁶ ⁷⁷ ⁷⁸ ⁷⁹ ⁸⁰ ⁸¹ ⁸² ⁸³ ⁸⁴ ⁸⁵ ⁸⁶ ⁸⁷ ⁸⁸ ⁸⁹ ⁹⁰ ⁹¹ ⁹² ⁹³ ⁹⁴ ⁹⁵ ⁹⁶ ⁹⁷ ⁹⁸ ⁹⁹ ¹⁰⁰ ¹⁰¹ ¹⁰² ¹⁰³ ¹⁰⁴ ¹⁰⁵ ¹⁰⁶ ¹⁰⁷ ¹⁰⁸ ¹⁰⁹ ¹¹⁰ ¹¹¹ ¹¹² ¹¹³ ¹¹⁴ ¹¹⁵ ¹¹⁶ ¹¹⁷ ¹¹⁸ ¹¹⁹ ¹²⁰ ¹²¹ ¹²² ¹²³ ¹²⁴ ¹²⁵ ¹²⁶ ¹²⁷ ¹²⁸ ¹²⁹ ¹³⁰ ¹³¹ ¹³² ¹³³ ¹³⁴ ¹³⁵ ¹³⁶ ¹³⁷ ¹³⁸ ¹³⁹ ¹⁴⁰ ¹⁴¹ ¹⁴² ¹⁴³ ¹⁴⁴ ¹⁴⁵ ¹⁴⁶ ¹⁴⁷ ¹⁴⁸ ¹⁴⁹ ¹⁵⁰ ¹⁵¹ ¹⁵² ¹⁵³ ¹⁵⁴ ¹⁵⁵ ¹⁵⁶ ¹⁵⁷ ¹⁵⁸ ¹⁵⁹ ¹⁶⁰ ¹⁶¹ ¹⁶² ¹⁶³ ¹⁶⁴ ¹⁶⁵ ¹⁶⁶ ¹⁶⁷ ¹⁶⁸ ¹⁶⁹ ¹⁷⁰ ¹⁷¹ ¹⁷² ¹⁷³ ¹⁷⁴ ¹⁷⁵ ¹⁷⁶ ¹⁷⁷ ¹⁷⁸ ¹⁷⁹ ¹⁸⁰ ¹⁸¹ ¹⁸² ¹⁸³ ¹⁸⁴ ¹⁸⁵ ¹⁸⁶ ¹⁸⁷ ¹⁸⁸ ¹⁸⁹ ¹⁹⁰ ¹⁹¹ ¹⁹² ¹⁹³ ¹⁹⁴ ¹⁹⁵ ¹⁹⁶ ¹⁹⁷ ¹⁹⁸ ¹⁹⁹ ²⁰⁰ ²⁰¹ ²⁰² ²⁰³ ²⁰⁴ ²⁰⁵ ²⁰⁶ ²⁰⁷ ²⁰⁸ ²⁰⁹ ²¹⁰ ²¹¹ ²¹² ²¹³ ²¹⁴ ²¹⁵ ²¹⁶ ²¹⁷ ²¹⁸ ²¹⁹ ²²⁰ ²²¹ ²²² ²²³ ²²⁴ ²²⁵ ²²⁶ ²²⁷ ²²⁸ ²²⁹ ²³⁰ ²³¹ ²³² ²³³ ²³⁴ ²³⁵ ²³⁶ ²³⁷ ²³⁸ ²³⁹ ²⁴⁰ ²⁴¹ ²⁴² ²⁴³ ²⁴⁴ ²⁴⁵ ²⁴⁶ ²⁴⁷ ²⁴⁸ ²⁴⁹ ²⁵⁰ ²⁵¹ ²⁵² ²⁵³ ²⁵⁴ ²⁵⁵ ²⁵⁶ ²⁵⁷ ²⁵⁸ ²⁵⁹ ²⁶⁰ ²⁶¹ ²⁶² ²⁶³ ²⁶⁴ ²⁶⁵ ²⁶⁶ ²⁶⁷ ²⁶⁸ ²⁶⁹ ²⁷⁰ ²⁷¹ ²⁷² ²⁷³ ²⁷⁴ ²⁷⁵ ²⁷⁶ ²⁷⁷ ²⁷⁸ ²⁷⁹ ²⁸⁰ ²⁸¹ ²⁸² ²⁸³ ²⁸⁴ ²⁸⁵ ²⁸⁶ ²⁸⁷ ²⁸⁸ ²⁸⁹ ²⁹⁰ ²⁹¹ ²⁹² ²⁹³ ²⁹⁴ ²⁹⁵ ²⁹⁶ ²⁹⁷ ²⁹⁸ ²⁹⁹ ³⁰⁰ ³⁰¹ ³⁰² ³⁰³ ³⁰⁴ ³⁰⁵ ³⁰⁶ ³⁰⁷ ³⁰⁸ ³⁰⁹ ³¹⁰ ³¹¹ ³¹² ³¹³ ³¹⁴ ³¹⁵ ³¹⁶ ³¹⁷ ³¹⁸ ³¹⁹ ³²⁰ ³²¹ ³²² ³²³ ³²⁴ ³²⁵ ³²⁶ ³²⁷ ³²⁸ ³²⁹ ³³⁰ ³³¹ ³³² ³³³ ³³⁴ ³³⁵ ³³⁶ ³³⁷ ³³⁸ ³³⁹ ³⁴⁰ ³⁴¹ ³⁴² ³⁴³ ³⁴⁴ ³⁴⁵ ³⁴⁶ ³⁴⁷ ³⁴⁸ ³⁴⁹ ³⁵⁰ ³⁵¹ ³⁵² ³⁵³ ³⁵⁴ ³⁵⁵ ³⁵⁶ ³⁵⁷ ³⁵⁸ ³⁵⁹ ³⁶⁰ ³⁶¹ ³⁶² ³⁶³ ³⁶⁴ ³⁶⁵ ³⁶⁶ ³⁶⁷ ³⁶⁸ ³⁶⁹ ³⁷⁰ ³⁷¹ ³⁷² ³⁷³ ³⁷⁴ ³⁷⁵ ³⁷⁶ ³⁷⁷ ³⁷⁸ ³⁷⁹ ³⁸⁰ ³⁸¹ ³⁸² ³⁸³ ³⁸⁴ ³⁸⁵ ³⁸⁶ ³⁸⁷ ³⁸⁸ ³⁸⁹ ³⁹⁰ ³⁹¹ ³⁹² ³⁹³ ³⁹⁴ ³⁹⁵ ³⁹⁶ ³⁹⁷ ³⁹⁸ ³⁹⁹ ⁴⁰⁰ ⁴⁰¹ ⁴⁰² ⁴⁰³ ⁴⁰⁴ ⁴⁰⁵ ⁴⁰⁶ ⁴⁰⁷ ⁴⁰⁸ ⁴⁰⁹ ⁴¹⁰ ⁴¹¹ ⁴¹² ⁴¹³ ⁴¹⁴ ⁴¹⁵ ⁴¹⁶ ⁴¹⁷ ⁴¹⁸ ⁴¹⁹ ⁴²⁰ ⁴²¹ ⁴²² ⁴²³ ⁴²⁴ ⁴²⁵ ⁴²⁶ ⁴²⁷ ⁴²⁸ ⁴²⁹ ⁴³⁰ ⁴³¹ ⁴³² ⁴³³ ⁴³⁴ ⁴³⁵ ⁴³⁶ ⁴³⁷ ⁴³⁸ ⁴³⁹ ⁴⁴⁰ ⁴⁴¹ ⁴⁴² ⁴⁴³ ⁴⁴⁴ ⁴⁴⁵ ⁴⁴⁶ ⁴⁴⁷ ⁴⁴⁸ ⁴⁴⁹ ⁴⁵⁰ ⁴⁵¹ ⁴⁵² ⁴⁵³ ⁴⁵⁴ ⁴⁵⁵ ⁴⁵⁶ ⁴⁵⁷ ⁴⁵⁸ ⁴⁵⁹ ⁴⁶⁰ ⁴⁶¹ ⁴⁶² ⁴⁶³ ⁴⁶⁴ ⁴⁶⁵ ⁴⁶⁶ ⁴⁶⁷ ⁴⁶⁸ ⁴⁶⁹ ⁴⁷⁰ ⁴⁷¹ ⁴⁷² ⁴⁷³ ⁴⁷⁴ ⁴⁷⁵ ⁴⁷⁶ ⁴⁷⁷ ⁴⁷⁸ ⁴⁷⁹ ⁴⁸⁰ ⁴⁸¹ ⁴⁸² ⁴⁸³ ⁴⁸⁴ ⁴⁸⁵ ⁴⁸⁶ ⁴⁸⁷ ⁴⁸⁸ ⁴⁸⁹ ⁴⁹⁰ ⁴⁹¹ ⁴⁹² ⁴⁹³ ⁴⁹⁴ ⁴⁹⁵ ⁴⁹⁶ ⁴⁹⁷ ⁴⁹⁸ ⁴⁹⁹ ⁵⁰⁰ ⁵⁰¹ ⁵⁰² ⁵⁰³ ⁵⁰⁴ ⁵⁰⁵ ⁵⁰⁶ ⁵⁰⁷ ⁵⁰⁸ ⁵⁰⁹ ⁵¹⁰ ⁵¹¹ ⁵¹² ⁵¹³ ⁵¹⁴ ⁵¹⁵ ⁵¹⁶ ⁵¹⁷ ⁵¹⁸ ⁵¹⁹ ⁵²⁰ ⁵²¹ ⁵²² ⁵²³ ⁵²⁴ ⁵²⁵ ⁵²⁶ ⁵²⁷ ⁵²⁸ ⁵²⁹ ⁵³⁰ ⁵³¹ ⁵³² ⁵³³ ⁵³⁴ ⁵³⁵ ⁵³⁶ ⁵³⁷ ⁵³⁸ ⁵³⁹ ⁵⁴⁰ ⁵⁴¹ ⁵⁴² ⁵⁴³ ⁵⁴⁴ ⁵⁴⁵ ⁵⁴⁶ ⁵⁴⁷ ⁵⁴⁸ ⁵⁴⁹ ⁵⁵⁰ ⁵⁵¹ ⁵⁵² ⁵⁵³ ⁵⁵⁴ ⁵⁵⁵ ⁵⁵⁶ ⁵⁵⁷ ⁵⁵⁸ ⁵⁵⁹ ⁵⁶⁰ ⁵⁶¹ ⁵⁶² ⁵⁶³ ⁵⁶⁴ ⁵⁶⁵ ⁵⁶⁶ ⁵⁶⁷ ⁵⁶⁸ ⁵⁶⁹ ⁵⁷⁰ ⁵⁷¹ ⁵⁷² ⁵⁷³ ⁵⁷⁴ ⁵⁷⁵ ⁵⁷⁶ ⁵⁷⁷ ⁵⁷⁸ ⁵⁷⁹ ⁵⁸⁰ ⁵⁸¹ ⁵⁸² ⁵⁸³ ⁵⁸⁴ ⁵⁸⁵ ⁵⁸⁶ ⁵⁸⁷ ⁵⁸⁸ ⁵⁸⁹ ⁵⁹⁰ ⁵⁹¹ ⁵⁹² ⁵⁹³ ⁵⁹⁴ ⁵⁹⁵ ⁵⁹⁶ ⁵⁹⁷ ⁵⁹⁸ ⁵⁹⁹ ⁶⁰⁰ ⁶⁰¹ ⁶⁰² ⁶⁰³ ⁶⁰⁴ ⁶⁰⁵ ⁶⁰⁶ ⁶⁰⁷ ⁶⁰⁸ ⁶⁰⁹ ⁶¹⁰ ⁶¹¹ ⁶¹² ⁶¹³ ⁶¹⁴ ⁶¹⁵ ⁶¹⁶ ⁶¹⁷ ⁶¹⁸ ⁶¹⁹ ⁶²⁰ ⁶²¹ ⁶²² ⁶²³ ⁶²⁴ ⁶²⁵ ⁶²⁶ ⁶²⁷ ⁶²⁸ ⁶²⁹ ⁶³⁰ ⁶³¹ ⁶³² ⁶³³ ⁶³⁴ ⁶³⁵ ⁶³⁶ ⁶³⁷ ⁶³⁸ ⁶³⁹ ⁶⁴⁰ ⁶⁴¹ ⁶⁴² ⁶⁴³ ⁶⁴⁴ ⁶⁴⁵ ⁶⁴⁶ ⁶⁴⁷ ⁶⁴⁸ ⁶⁴⁹ ⁶⁵⁰ ⁶⁵¹ ⁶⁵² ⁶⁵³ ⁶⁵⁴ ⁶⁵⁵ ⁶⁵⁶ ⁶⁵⁷ ⁶⁵⁸ ⁶⁵⁹ ⁶⁶⁰ ⁶⁶¹ ⁶⁶² ⁶⁶³ ⁶⁶⁴ ⁶⁶⁵ ⁶⁶⁶ ⁶⁶⁷ ⁶⁶⁸ ⁶⁶⁹ ⁶⁷⁰ ⁶⁷¹ ⁶⁷² ⁶⁷³ ⁶⁷⁴ ⁶⁷⁵ ⁶⁷⁶ ⁶⁷⁷ ⁶⁷⁸ ⁶⁷⁹ ⁶⁸⁰ ⁶⁸¹ ⁶⁸² ⁶⁸³ ⁶⁸⁴ ⁶⁸⁵ ⁶⁸⁶ ⁶⁸⁷ ⁶⁸⁸ ⁶⁸⁹ ⁶⁹⁰ ⁶⁹¹ ⁶⁹² ⁶⁹³ ⁶⁹⁴ ⁶⁹⁵ ⁶⁹⁶ ⁶⁹⁷ ⁶⁹⁸ ⁶⁹⁹ ⁷⁰⁰ ⁷⁰¹ ⁷⁰² ⁷⁰³ ⁷⁰⁴ ⁷⁰⁵ ⁷⁰⁶ ⁷⁰⁷ ⁷⁰⁸ ⁷⁰⁹ ⁷¹⁰ ⁷¹¹ ⁷¹² ⁷¹³ ⁷¹⁴ ⁷¹⁵ ⁷¹⁶ ⁷¹⁷ ⁷¹⁸ ⁷¹⁹ ⁷²⁰ ⁷²¹ ⁷²² ⁷²³ ⁷²⁴ ⁷²⁵ ⁷²⁶ ⁷²⁷ ⁷²⁸ ⁷²⁹ ⁷³⁰ ⁷³¹ ⁷³² ⁷³³ ⁷³⁴ ⁷³⁵ ⁷³⁶ ⁷³⁷ ⁷³⁸ ⁷³⁹ ⁷⁴⁰ ⁷⁴¹ ⁷⁴² ⁷⁴³ ⁷⁴⁴ ⁷⁴⁵ ⁷⁴⁶ ⁷⁴⁷ ⁷⁴⁸ ⁷⁴⁹ ⁷⁵⁰ ⁷⁵¹ ⁷⁵² ⁷⁵³ ⁷⁵⁴ ⁷⁵⁵ ⁷⁵⁶ ⁷⁵⁷ ⁷⁵⁸ ⁷⁵⁹ ⁷⁶⁰ ⁷⁶¹ ⁷⁶² ⁷⁶³ ⁷⁶⁴ ⁷⁶⁵ ⁷⁶⁶ ⁷⁶⁷ ⁷⁶⁸ ⁷⁶⁹ ⁷⁷⁰ ⁷⁷¹ ⁷⁷² ⁷⁷³ ⁷⁷⁴ ⁷⁷⁵ ⁷⁷⁶ ⁷⁷⁷ ⁷⁷⁸ ⁷⁷⁹ ⁷⁸⁰ ⁷⁸¹ ⁷⁸² ⁷⁸³ ⁷⁸⁴ ⁷⁸⁵ ⁷⁸⁶ ⁷⁸⁷ ⁷⁸⁸ ⁷⁸⁹ ⁷⁹⁰ ⁷⁹¹ ⁷⁹² ⁷⁹³ ⁷⁹⁴ ⁷⁹⁵ ⁷⁹⁶ ⁷⁹⁷ ⁷⁹⁸ ⁷⁹⁹ ⁸⁰⁰ ⁸⁰¹ ⁸⁰² ⁸⁰³ ⁸⁰⁴ ⁸⁰⁵ ⁸⁰⁶ ⁸⁰⁷ ⁸⁰⁸ ⁸⁰⁹ ⁸¹⁰ ⁸¹¹ ⁸¹² ⁸¹³ ⁸¹⁴ ⁸¹⁵ ⁸¹⁶ ⁸¹⁷ ⁸¹⁸ ⁸¹⁹ ⁸²⁰ ⁸²¹ ⁸²² ⁸²³ ⁸²⁴ ⁸²⁵ ⁸²⁶ ⁸²⁷ ⁸²⁸ ⁸²⁹ ⁸³⁰ ⁸³¹ ⁸³² ⁸³³ ⁸³⁴ ⁸³⁵ ⁸³⁶ ⁸³⁷ ⁸³⁸ ⁸³⁹ ⁸⁴⁰ ⁸⁴¹ ⁸⁴² ⁸⁴³ ⁸⁴⁴ ⁸⁴⁵ ⁸⁴⁶ ⁸⁴⁷ ⁸⁴⁸ ⁸⁴⁹ ⁸⁵⁰ ⁸⁵¹ ⁸⁵² ⁸⁵³ ⁸⁵⁴ ⁸⁵⁵ ⁸⁵⁶ ⁸⁵⁷ ⁸⁵⁸ ⁸⁵⁹ ⁸⁶⁰ ⁸⁶¹ ⁸⁶² ⁸⁶³ ⁸⁶⁴ ⁸⁶⁵ ⁸⁶⁶ ⁸⁶⁷ ⁸⁶⁸ ⁸⁶⁹ ⁸⁷⁰ ⁸⁷¹ ⁸⁷² ⁸⁷³ ⁸⁷⁴ ⁸⁷⁵ ⁸⁷⁶ ⁸⁷⁷ ⁸⁷⁸ ⁸⁷⁹ ⁸⁸⁰ ⁸⁸¹ ⁸⁸² ⁸⁸³ ⁸⁸⁴ ⁸⁸⁵ ⁸⁸⁶ ⁸⁸⁷ ⁸⁸⁸ ⁸⁸⁹ ⁸⁹⁰ ⁸⁹¹ ⁸⁹² ⁸⁹³ ⁸⁹⁴ ⁸⁹⁵ ⁸⁹⁶ ⁸⁹⁷ ⁸⁹⁸ ⁸⁹⁹ ⁹⁰⁰ ⁹⁰¹ ⁹⁰² ⁹⁰³ ⁹⁰⁴ ⁹⁰⁵ ⁹⁰⁶ ⁹⁰⁷ ⁹⁰⁸ ⁹⁰⁹ ⁹¹⁰ ⁹¹¹ ⁹¹² ⁹¹³ ⁹¹⁴ ⁹¹⁵ ⁹¹⁶ ⁹¹⁷ ⁹¹⁸ ⁹¹⁹ ⁹²⁰ ⁹²¹ ⁹²² ⁹²³ ⁹²⁴ ⁹²⁵ ⁹²⁶ ⁹²⁷ ⁹²⁸ ⁹²⁹ ⁹³⁰ ⁹³¹ ⁹³² ⁹³³ ⁹³⁴ ⁹³⁵ ⁹³⁶ ⁹³⁷ ⁹³⁸ ⁹³⁹ ⁹⁴⁰ ⁹⁴¹ ⁹⁴² ⁹⁴³ ⁹⁴⁴ ⁹⁴⁵ ⁹⁴⁶ ⁹⁴⁷ ⁹⁴⁸ ⁹⁴⁹ ⁹⁵⁰ ⁹⁵¹ ⁹⁵² ⁹⁵³ ⁹⁵⁴ ⁹⁵⁵ ⁹⁵⁶ ⁹⁵⁷ ⁹⁵⁸ ⁹⁵⁹ ⁹⁶⁰ ⁹⁶¹ ⁹⁶² ⁹⁶³ ⁹⁶⁴ ⁹⁶⁵ ⁹⁶⁶ ⁹⁶⁷ ⁹⁶⁸ ⁹⁶⁹ ⁹⁷⁰ ⁹⁷¹ ⁹⁷² ⁹⁷³ ⁹⁷⁴ ⁹⁷⁵ ⁹⁷⁶ ⁹⁷⁷ ⁹⁷⁸ ⁹⁷⁹ ⁹⁸⁰ ⁹⁸¹ ⁹⁸² ⁹⁸³ ⁹⁸⁴ ⁹⁸⁵ ⁹⁸⁶ ⁹⁸⁷ ⁹⁸⁸ ⁹⁸⁹ ⁹⁹⁰ ⁹⁹¹ ⁹⁹² ⁹⁹³ ⁹⁹⁴ ⁹⁹⁵ ⁹⁹⁶ ⁹⁹⁷ ⁹⁹⁸ ⁹⁹⁹ ¹⁰⁰⁰ ¹⁰⁰¹ ¹⁰⁰² ¹⁰⁰³ ¹⁰⁰⁴ ¹⁰⁰⁵ ¹⁰⁰⁶ ¹⁰⁰⁷ ¹⁰⁰⁸ ¹⁰⁰⁹ ¹⁰¹⁰ ¹⁰¹¹ ¹⁰¹² ¹⁰¹³ ¹⁰¹⁴ ¹⁰¹⁵ ¹⁰¹⁶ ¹⁰¹⁷ ¹⁰¹⁸ ¹⁰¹⁹ ¹⁰²⁰ ¹⁰²¹ ¹⁰²² ¹⁰²³ ¹⁰²⁴ ¹⁰²⁵ ¹⁰²⁶ ¹⁰²⁷ ¹⁰²⁸ ¹⁰²⁹ ¹⁰³⁰ ¹⁰³¹ ¹⁰³² ¹⁰³³ ¹⁰³⁴ ¹⁰³⁵ ¹⁰³⁶ ¹⁰³⁷ ¹⁰³⁸ ¹⁰³⁹ ¹⁰⁴⁰ ¹⁰⁴¹ ¹⁰⁴² ¹⁰⁴³ ¹⁰⁴⁴ ¹⁰⁴⁵ ¹⁰⁴⁶ ¹⁰⁴⁷ ¹⁰⁴⁸ ¹⁰⁴⁹ ¹⁰⁵⁰ ¹⁰⁵¹ ¹⁰⁵² ¹⁰⁵³ ¹⁰⁵⁴ ¹⁰⁵⁵ ¹⁰⁵⁶ ¹⁰⁵⁷ ¹⁰⁵⁸ ¹⁰⁵⁹ ¹⁰⁶⁰ ¹⁰⁶¹ ¹⁰⁶² ¹⁰⁶³ ¹⁰⁶⁴ ¹⁰⁶⁵ ¹⁰⁶⁶ ¹⁰⁶⁷ ¹⁰⁶⁸ ¹⁰⁶⁹ ¹⁰⁷⁰ ¹⁰⁷¹ ¹⁰⁷² ¹⁰⁷³ ¹⁰⁷⁴ ¹⁰⁷⁵ ¹⁰⁷⁶ ¹⁰⁷⁷ ¹⁰⁷⁸ ¹⁰⁷⁹ ¹⁰⁸⁰ ¹⁰⁸¹ ¹⁰⁸² ¹⁰⁸³ ¹⁰⁸⁴ ¹⁰⁸⁵ ¹⁰⁸⁶ ¹⁰⁸⁷ ¹⁰⁸⁸ ¹⁰⁸⁹ ¹⁰⁹⁰ ¹⁰⁹¹ ¹⁰⁹² ¹⁰⁹³ ¹⁰⁹⁴ ¹⁰⁹⁵ ¹⁰⁹⁶ ¹⁰⁹⁷ ¹⁰⁹⁸ ¹⁰⁹⁹ ¹¹⁰⁰ ¹¹⁰¹ ¹¹⁰² ¹¹⁰³ ¹¹⁰⁴ ¹¹⁰⁵ ¹¹⁰⁶ ¹¹⁰⁷ ¹¹⁰⁸ ¹¹⁰⁹ ¹¹¹⁰ ¹¹¹¹ ¹¹¹² ¹¹¹³ ¹¹¹⁴ ¹¹¹⁵ ¹¹¹⁶ ¹¹¹⁷ ¹¹¹⁸ ¹¹¹⁹ ¹¹²⁰ ¹¹²¹ ¹¹²² ¹¹²³ ¹¹²⁴ ¹¹²⁵ ¹¹²⁶ ¹¹²⁷ ¹¹²⁸ ¹¹²⁹ ¹¹³⁰ ¹¹³¹ ¹¹³² ¹¹³³ ¹¹³⁴ ¹¹³⁵ ¹¹³⁶ ¹¹³⁷ ¹¹³⁸ ¹¹³⁹ ¹¹⁴⁰ ¹¹⁴¹ ¹¹⁴² ¹¹⁴³ ¹¹⁴⁴ ¹¹⁴⁵ ¹¹⁴⁶ ¹¹⁴⁷ ¹¹⁴⁸ ¹¹⁴⁹ ¹¹⁵⁰ ¹¹⁵¹ ¹¹⁵² ¹¹⁵³ ¹¹⁵⁴ ¹¹⁵⁵ ¹¹⁵⁶ ¹¹⁵⁷ ¹¹⁵⁸ ¹¹⁵⁹ ¹¹⁶⁰ ¹¹⁶¹ ¹¹⁶² ¹¹⁶³ ¹¹⁶⁴ ¹¹⁶⁵ ¹¹⁶⁶ ¹¹⁶⁷ ¹¹⁶⁸ ¹¹⁶⁹ ¹¹⁷⁰ ¹¹⁷¹ ¹¹⁷² ¹¹⁷³ ¹¹⁷⁴ ¹¹⁷⁵ ¹¹⁷⁶ ¹¹⁷⁷ ¹¹⁷⁸ ¹¹⁷⁹ ¹¹⁸⁰ ¹¹⁸¹ ¹¹⁸² ¹¹⁸³ ¹¹⁸⁴ ¹¹⁸⁵ ¹¹⁸⁶ ¹¹⁸⁷ ¹¹⁸⁸ ¹¹⁸⁹ ¹¹⁹⁰ ¹¹⁹¹ ¹¹⁹² ¹¹⁹³ ¹¹⁹⁴ ¹¹⁹⁵ ¹¹⁹⁶ ¹¹⁹⁷ ¹¹⁹⁸ ¹¹⁹⁹ ¹²⁰⁰ ¹²⁰¹ ¹²⁰² ¹²⁰³ ¹²⁰⁴ ¹²⁰⁵ ¹²⁰⁶ ¹²⁰⁷ ¹²⁰⁸ ¹²⁰⁹ ¹²¹⁰ ¹²¹¹ ¹²¹² ¹²¹³ ¹²¹⁴ ¹²¹⁵ ¹²¹⁶ ¹²¹⁷ ¹²¹⁸ ¹²¹⁹ ¹²²⁰ ¹²²¹ ¹²²² ¹²²³ ¹²²⁴ ¹²²⁵ ¹²²⁶ ¹²²⁷ ¹²²⁸ ¹²²⁹ ¹²³⁰ ¹²³¹ ¹²³² ¹²³³ ¹²³⁴ ¹²³⁵ ¹²³⁶ ¹²³⁷ ¹²³⁸ ¹²³⁹ ¹²⁴⁰ ¹²⁴¹ ¹²⁴² ¹²⁴³ ¹²⁴⁴ ¹²⁴⁵ ¹²⁴⁶ ¹²⁴⁷ ¹²⁴⁸ ¹²⁴⁹ ¹²⁵⁰ ¹²⁵¹ ¹²⁵² ¹²⁵³ ¹²⁵⁴ ¹²⁵⁵ ¹²⁵⁶ ¹²⁵⁷ ¹²⁵⁸ ¹²⁵⁹ ¹²⁶⁰ ¹²⁶¹ ¹²⁶² ¹²⁶³ ¹²⁶⁴ ¹²⁶⁵ ¹²⁶⁶ ¹²⁶⁷ ¹²⁶⁸ ¹²⁶⁹ ¹²⁷⁰ ¹²⁷¹ ¹²⁷² ¹²⁷³ ¹²⁷⁴ ¹²⁷⁵ ¹²⁷⁶ ¹²⁷⁷ ¹²⁷⁸ ¹²⁷⁹ ¹²⁸⁰ ¹²⁸¹ ¹²⁸² ¹²⁸³ ¹²⁸⁴ ¹²⁸⁵ ¹²⁸⁶ ¹²⁸⁷ ¹²⁸⁸ ¹²⁸⁹ ¹²⁹⁰ ¹²⁹¹ ¹²⁹² ¹²⁹³ ¹²⁹⁴ ¹²⁹⁵ ¹²⁹⁶ ¹²⁹⁷ ¹²⁹⁸ ¹²⁹⁹ ¹³⁰⁰ ¹³⁰¹ ¹³⁰² ¹³⁰³ ¹³⁰⁴ ¹³⁰⁵ ¹³⁰⁶ ¹³⁰⁷ ¹³⁰⁸ ¹³⁰⁹ ¹³¹⁰ ¹³¹¹ ¹³¹² ¹³¹³ ¹³¹⁴ ¹³¹⁵ ¹³





UNIVERSITY OF ILLINOIS-URBANA

875.6G89E

C001

JOANN. LANDISCHUTI



3 0112 023729897